

明滇南五名臣遺集

~ 16
2843
2



門 16
號 2843
卷 2

詩集

安甯楊文襄公著

聞人道漢中事

後學李根源鈔輯

相逢漢中人為問漢中事政殘令復弛此階誰作厲有兵
不識門有地無遺利紛紛斂攘徒來自川西地初焉甚微
眇可以折筭治玩寇者為誰彌文乃蒙蔽星星不時撲漸
成燎原勢重煩宵旰憂撫捕勤大吏彼氓亦何知從亂豈
其意分明盜兵革潢池作兒戲胡忘渤海言而昧朝歌智
居然恣屠戮為此首功計番兵及礦徒剽掠失防制如以
賊禦賊進退誰適避甯偷從賊生懼作迎降斃遂令漢沔
間羣盜益昌熾村落莽成墟堊煙沿無際師久力漸屈饋

明真南五石巨集

楊文襄詩集

早稻田大學圖書館
品 25.6.13
藏 來

餉遠難繼壯士饑而逃道途目相視關津不敢詰將領莫
能致仲秋交兵辰諸軍自同異貔貅頗創傷狐鼠未懲艾
如聞制府來轅門稍生氣夾攻本良策萬全亦非易成功
在此舉莫使再顛躓人言川賊興正坐科徵敝民窮道斯
起思之無乃是反本宜急圖窮誅竟何濟邇來天監佑大
奸伏椹鑽湯網解而疎武戈藏不試寄語賣劍人太平今
立至

歸至京口舟中感興二首

繫舟蔭高樹掛席揚天風夕照變巖姿白雲行水中塵慮
忽以忘豁然心境融緬懷十年前何事不匆匆倚杖看斗
牛銀河麗層空扶桑豈無路清淺元相通晞髮吾所願至

人苦難逢

微風動蘋花落日照野棠鄉心信歸帆溪草亦自芳江南
水竹居待我幾星霜昨歸不出戶今歸不下堂平生性倔
強與世違低昂擲掄豈足異真樂吾未央月明楊柳疏露
下芙蓉涼聞道嗟已晚眷言惜流光

金山寺

爲學如爲山且欲濟其巔望道如望洋誰能涉其淵振衣
妙高臺濯纓中冷泉茲行良有得不在山水間知音若遼
絕俛仰復何言

送安城張都憲督運還鎮

文星北狩開洪基古之燕薊今邦畿官河舳艫挽飛粟歲

四百萬供京師直從三湖到瀛海四十餘閘中透迤雖云
恭襄擅勞績廟筭天假非人爲漕規百年漸成敝民財已
盡兵兼疲豪門貸券不知數公廩未入私逋追奸人復此
恣漁獵罔念膏血成塗泥君王聞之重悽測曰此瘡痍當
底綬詔求經濟起頽廢公名首應朝堂推都臺舊豸許重
著先聲忽滿清淮湄褰帷問俗布新政風霜雨露無偏私
人言更化先將領疎屏庸瑣將無遺明揚才俊給任使數
月威令如飈馳高山虎豹莫敢狎精采一變非前時疲氓
做卒摠生氣昔者戚戚今嬉嬉朝廷綱紀藉臺憲頗恨吾
人翻壞之姑息之風滿天下漢家三尺空然持剛者矯枉
不達變志固可取終何裨不然淫刑肆屠刈忍寡人婦孤

人兒公柔不茹剛不吐寬嚴兩酌還平施淵魚苛察豈公
事權度在我誰能欺漕司政務亦慎委老匠坐授羣工治
如身使臂臂使指大綱一舉萬目隨安得皆公撫諸鎮頓
使赤子回春熙嗟予關中舊分憲蒞公節下叨公知迂疏
未敢辱同調頗覺氣類原相宜公今入覲天顏喜搢紳動
色瞻風儀太常間曹無報稱卻望賢勞增忸怩秋風冠蓋
送歸鎮把酒欲賦難爲辭似聞臺省虛公位尙爲淮人歌
去思

砥柱行

長江萬餘里來自岷山巔摩空亘地不知幾千載直與造
化爭機權千載萬派時吐納滾滾下徹滄溟淵當年神龍

日江詩名目集
驅百怪宵馳晝走無停鞭巖推峯圻在頃刻濤決浪倒湯
湯浩浩止有巨浸無平田天應愁海若懼排清都訢上帝
帝聞曰吁其何傷錫以砥柱爲隄防中流無聲屹相向狂
瀾過之不敢狂江漢朝宗衡嵩鎮定乾爲之清坤歸其靜
猗歟嗟哉雨雲變態晨昏殊風波世路多艱虞元氣一脈
須匡扶何人能作砥柱乎柱乎柱乎今有無

遊法華寺和韻

重關絕來往惟有白雲通萬事都歸幻浮生本是空心間
波自止性定月方中亦有淵明興留詩寄遠公

甘涼道書事感懷

弧矢威天下雷霆震域中大兵方出塞小醜自相攻繼絕

君王義宣威將帥功從今宵盱慮不復在西戎

邊城詩

漠漠窮邊路迢迢一騎塵四時常見雪五月未知春霄漢
求賢意馳驅報主身逢時今老大羞作素殮人

過河州

四面峯巒鎖翠帷萬家花柳及春栽纜橫河岸浮爲渡磨
引溪流水自推漢將屯田閑虎帳羌兒交市獻龍媒便宜
有疏憑誰上聖代邊功久不開

固原鼓樓二首

西閣風高鼓角雄南來形勝倚崆峒青圍睥睨諸山繞綠
引潺湲一水通擊壤有歌農事足折衝多暇塞塵空登樓

不盡籌邊意渺渺龍沙一望中
千里關河入望微四山烟雨翠成圍蒹葭淺水孤鴻盡首
蒼秋風萬馬肥聖主不教勤遠略書生敢謂識戎機單于
已撤穹廬遜體國初心幸不違

將至涼州

雉堞連雲十里城將臣開府此屯兵山連虎帳千年固地
接龍沙一掌平塞上馬嘶春草色村中人和凱歌聲祇因
邊徼無烽火忘却關山是遠行

山丹題壁

關山偏仄人踪少風雨蒼茫野色昏萬里一身難獨任百
年多事共誰論東風四月初生草落日孤城早閉門記取

漢兵追寇地沙場猶有未招魂

將至甯夏

奉詔西征駐節時元戎奏凱已先期苗民自逆三旬命獵
猶何勞六月師燈火家家開夜戶弓刀處處捲風旗益兵
加賦休重論財賦於今兩不支

聽雪

庭樹蕭蕭夢屢驚幾回風景逼人清坐吟食葉春蠶句起
聽空山裂帛聲寒落瓦溝停更響爽疑天籟靜還生憑誰
爲續幽蘭調萬古悠悠此夜情

孤山堡

簇簇青山隱戍樓暫時登眺使人愁西風畫角孤城曉落

日晴沙萬里秋甲士解鞍休戰馬農兒持券買耕牛回思
未築邊牆日曾得清平似此不

出連雲棧

雞頭關下石杈牙傍險憑高此駐車一水縈紆通漢沔萬
峯廻合控褒斜雲中板閣燒難絕谷口篋管翠欲遮蜀道
秦關俱莫論於今四海正爲家

宿子午舖

躡磴穿蘿路轉遙夜寒燈火正蕭蕭官程仍出子午谷鄉
夢遠懷丁卯橋秦嶺天低星斗近漢江春暖瘴嵐消馳驅
敢作賢勞歎愧乏涓埃荅聖朝

興國道中

十日登程九日晴鄉心羈思一時平鳥聲細逐泉聲緩風
力寒欺酒力輕馬首青山看入畫路傍幽草問無名逢人
若話經遊樂賸有篇章爲紀行

望岳陽

岳陽南望是夔州三十年來兩度遊同學故人今幾在異
鄉孤客此登樓高雲絕島連清漢落日層城俯碧流誰遣
王程戒明發吏情吾已負滄洲

出郊

向來塵慮已真拋一卧經年始出郊天下華陽稱八洞人
間福地是三茅病求仙木聊充餌老愛雲松願結巢夢覺
迷途自茲始北山猿鶴謾相嘲

西山雜咏二首

十里長堤一掌平野田溪草正縱橫青山遠映秋雲薄紅
樹疎含夕照明細若牽風浮不定落花隨水去無聲幽人
合是忘機者傳語沙鷗莫浪驚

夕陽紅樹遠平邱極目乾坤萬里秋自是閒官堪適興不
須吾士亦消憂幽崖礙日懸青蔓高閣憑虛瞰碧流咫尺
洞門無路入野雲孤鶴爲誰留

遊焦山

洞口孤雲面面生百年身世坐來清一般月色金山寺十
里烟光鐵甕城江閣雨餘秋水潤海門風定暮潮平青山
潦倒虛名在恥向沙鷗問舊盟

雨中王丹徒公濟招遊焦山席上作

無端秋色登臨地不盡長江眺望時世路渺然空作客風
光如此可無詩及辰爲樂人能幾冒雨看山興亦奇直待
曉晴凌絕頂徧摩蒼蘚認殘碑

登金山

西風殘葉嫩寒初兩日幽尋興不孤心愛竹巖留客坐力
窮雲磴倩人扶城頭山色遙連楚樹裡江聲直到吳莫怪
居人誇勝境分明此地是蓬壺

西湖

重向西湖續舊遊望中山色與雲浮平橋隔水雙溪合古
寺連雲萬木稠醉後納涼時枕石興來尋句或臨流幽棲

彷彿江南地祇欠漁翁一葉舟

西山口占示同遊諸子

偶向名山慰所思尋幽已是隔年期一春風雨清明後滿
目鶯花爛熳時老覺同遊非故侶笑看殘壁有前詩相逢
得意憑開口莫問迂疎引興遲

希大司馬扈駕至淮安便道過江訪余石淙精舍感

今憶昔口占一首

停雲回首意如何楊子江頭一棹過老去多情憐水石問
來開眼看風波門墻舊侶彫應盡燈火通宵話轉多更約
扁舟和月宿荻花深處聽漁歌

坐上宮道房

瑤池正對大茅峰一日間行萬慮空青鳥夜歸元圃月碧
桃春綻玉臺風上方樓觀天應近古洞蓬萊路或通便欲
尋仙還自笑夕陽芳草茂林中

重遊甘露寺

已辦登臨罷遠遊倦知吾土故多幽渡江形勝諸山小到
海風烟一目收晴影抱樓僧寺午寒聲飛雨釣巖秋滄波
滾滾何時定贏得丹心伴白頭

殷文濟過予待隱逸老二園有詩次韻答之

開園十載到於今喜遇知音慙賞心兩屐不嫌花徑僻一
杵長傍竹窻深醉眠石上殘苔蘚倦憩池頭狎水禽如此
風光如此客不知身世有煩襟

遊金山二首

坐上青蒼接渺漫樓臺面面枕高寒
八窓帆影隨湖過兩岸人家隔水看
地有江山成偉觀天將砥柱障狂瀾
塵心到此消應盡更欲臨風漱碧湍
留雲亭上立多時古木滄波動遠思
南北界分還此水孫張題後豈無詩
風高鵲嶺驚秋早江轉龍門到海遲
三十年餘塵夢裡每因登眺歎吾衰

金山之勝殆造物者所以遺乎人古詩人每出奇句與山爭勝惟張祐之作差足快意孫魴驚濤濺佛云者已不免徐凝之誚於談者之口若王介甫北固西興之句亦未必壓倒孫張吳楚乾坤扶桑弱水安得

此老大手筆哉自識

遊茅山漫興

丹梯百丈斷還連亘古名山此洞天
鳥怯高巖棲不定雲歸杳靄勢無前
將行直欲臨流坐醉後無妨枕石眠
不獨山人能愛客野花啼鳥亦忻然

華陽洞

吁嗟此洞天乃在人寰裡神仙不可窮
勝遊聊爾爾

拱華樓

螿水潺湲不斷流白雲芳草帶斜舟
坐來山色無餘地占盡風光是此樓
雞嶺夕陽高樹合石橋新雨落花稠
也知看竹須乘興不用東君掃榻留

和楊鏡川學士先生遊南園詩韻

官屈僅旋馬致客真無謀諸公不我棄枉駕同郊遊韓家
好庭宇石徑通林坵輕風散炎溽白露淒以秋泉脈灌畦
潤槐陰當屋稠地僻境逾靜身閒心更幽舉芳步南渚觀
稼來東疇高情不在酒而况饌與羞詞林有鉅筆古調難
為酬豈徒慰孤陋亦足消煩憂顰眉擬相效出吻還自籌
惟餘江山興歲歲無窮休

著軒

近名固可恥無聞亦虛生善積名以隨赫然播英聲譬如
玉在山草木競敷榮又如珠在淵風雲發光晶物理有如此
此愚者徒營營斯人克自樹敦茂性夙成俛焉飭厥躬所

志非沽名持謙乃受益欲晦願愈明良賈藏若虛鴻鐘扣
斯鳴請看尚綱詩毋忘謹獨情

謁橫渠祠

洙泗咽不流道源眇於絲寥寥千載下濂洛起浚之源深
流以長波及秦之郿至今橫渠派河洛爭分馳萬方被澤
潤豈但九里滋我生半江海望洋徒爾為茲行竊一勺頗
覺心神怡窮源顧未得臨流動遐思

河西書事

河西漢五郡在昔人稱雄聖朝罷郡縣宿兵障提封軍衙
一十五聯絡當要衝玉關據其西金城控其東莊涼達永
昌迤邐山丹通鎮番稍孤懸咫尺豺虎叢西甯市茶馬吾

得資戰功甘州扼其吭設險由化工甘泉水汪濊祁連山
鬱崇上將此開府握符總兵戎文臣實監之運籌帷幄中
相制如犬牙相資如厯聖偏裨各分鎮人自守與攻上承
下指使同寅仍協恭譬如大綱舉萬目紛以從聖人蒞中
國四夷仰華風梯航納琛貢孰敢不來降蠢茲失穴虜出
沒無定蹤搶攘數載間行路恒忡忡塞草靡遺綠狼煙不
絕紅我城鐵不如樓櫓摩蒼穹甲兵數十萬一一皆羆熊
以茲靜制動誰復當其鋒胡爲動雌伏不聞奏膚公朝廷
重養士比郡粟芻供自從撫馭乖股削無終窮遂令行伍
間熬瘞恒不充奄奄喘息徒如木蠹已空焉能效死力滅
沒甘秋蓬伊誰生厲階痛毒流瘰癧孛戮有餘罪何止罰

厥躬大明有普照神聽無遺聰綸音赫然下一綱羅羣兇
盡將疆場任昇之良與忠民物改觀聽山川洗昏蒙黃童
與白叟繫壤歌年豐人和古所貴德力難爲同行將銷鋒
鏑鞭矢彘其弓願歌於錄詩獻之明光宮

次西涯先生贈別

官程日西邁所至皆第宅端居感時事不寐耿連昔羈懷
勿復論有身孰非客顧非專制才能辦此勞劇區區一寸
心徒自爲形役蒼生固一體戚休本無隔願皇布明令爲
遺天下食

出西郊山行

石淙水清淺一葦不可航大峴山逶迤纍纍青石岡晨興

肅征夫與子同徜徉山行多戒心茲遊幸俱忘不須畏豺
虎豺虎避神羊不須畏荆棘拉朽隨干將平生千萬岐涉
歷如周行我老已息游子志方奮揚健哉圖南翮高舉滂
扶桑

舟中感興十首

澹澹微雲度悠悠孤鳥還莽莽前事幡幡衰後顏平生
曠達懷誤落塵網間迷途非遠而已破夢覺關所以慰我
情賴此江上山有口費吟哦有足窮躋攀行哉勿復疑一
笑發天慳

繫舟蔭高樹掛席揚天風夕照變巖姿白雲行水中塵慮
忽以忘豁然心境融緬懷十年前何事不匆匆倚杖看牛

斗銀河麗層空扶桑豈無路清淺元相通髭髮吾所願至
人苦難逢 重出

歸鴻作意號風露淒以秋所憂在簪七而豈稻梁謀萬族
各有托吾生本如浮雲山莽蒼蒼世事劇悠悠

諷詢徧關中經畧窮西夏平生所交游期軼韓范駕抱病
復遭讒薄命委飄瓦涸餘西江鮒瘦比東郊馬稽首戴君
恩明明肆天赦此身倘可報不惜膏草野

落葉下空山秋意始蕭爽長河四十闌舟航日來往兩洪
石峻嶒劍戟森相向魚龍猛欲鬪性命寄篙槳搖搖蕩風
波兀兀話疇曩誰知至險巖乃在人心上四顧忽忘言松
露滴清響

目注百五各目
貧來學賦詩五言不充腹悶來與客奕對局花滿目亦知
天地間二者俱不俗此復不自能大笑立於獨何如付盃
酒一醉萬事足酒醒坐披襟有書筒可讀心懸百尺樓夢
脫五斗粟夕霞誠亦佳可翫不可掬聊將無絃琴靜和淵
明曲

舟行及秋霽秋色明葦葭天高拖樓淺日落帆影斜故鄉
在目中澄江淨鷗沙愧非能賦才有句不足誇暮聽金山
潮朝滄北固霞持此不啻足悠悠送年華眾手劇雲雨長
途多覆車泯泯復波波浮生當奈何
向來年紀到胡不早休官人知進非易豈信退亦難先皇
天地恩有命重於山連章疏懇悃時荷溫語願觀兵虎貌

壯揮劍霜雪寒臣身不自惜恃此方寸丹多病違成功讒
言豈無端鼎湖望莫及血淚空汎漚

宋朝西事興廷議仗數公三策戰守和持論各不同韓公
初主戰提旅當賊鋒至今好水川流血餘腥風范公圖經
畧志守不志攻雕陰扼其吭靈武城其雄大順屹有築清
澗引而通雖無賊俘獻已遏賊馬衝終教賊膝屈西顧聊
從容臣本鉛槧儒豈不念除克功成枯萬骨生意隨秋蓬
而况兵家事勝敗誰能窮設險有明訓著之易象中沙場
四百里深塹連高墉一勞方永逸誓以輸愚忠云胡曉曉
者計不究初終凡民勿復道任耳紛章縫茲事信有數不
繫臧倉逢作詩俟君子庶幾希後功

希大夜過子辭有感

衰年重離別未別心已驚子行及秋暮感此寒螿鳴歧路
豈不多予懷久已平雖無兒女涕執手難爲情平生報國
身物望良匪輕我老百無庸遲子崇令名

安汝礪謝病還揚州賦古詩四章話別

相過尙嫌少况乃增離憂目斷南浦雲心逐長河流杜門
未浹月謝病章已投吾子年正彊藥石功易收胡爲南歸
興一發不可留我老日衰颯百病交相仇耳病蛙蟲鳴眼
病煙霧浮四肢病猶可心病難爲瘳子歸尋上醫問有神
丹不刀圭倘可得子當向子求

人生貴適意還家胡不樂賢者天下心而豈戀丘壑君生
際昌運早膺司諫托飭躬時惕厲論事恒蹇諤籌邊或借
箸所見誠鑿鑿邊庭方報警羽書日交錯君心未忘憂君
去非屣脫慎哉千金軀有喜當勿藥

風雲莽無極鶯花易春晚賞燈能幾時夏令入小滿青芳
眼中暗紅雨山頭亂此時還此別安能不悽惋別離何足
惜世情誰付管遲子崇令名勸子加餐飯

聞君欲習靜養疴金山中茲山近吾家秀色開鴻濛山雲
自舒卷江湖西復東昔吾抱病時獨往無定蹤當其興所
適心與混沌融夙疾忽以除不假砭熇功煩君語山僧我
將巢雲松

送河汝周謁選北上

子行不可尼我懷益忡忡去帆帶落日征路隨長風衰年
苦別離况乃家素通一尊向江滸何以紆情悰贈子金錯
刀光華慣晴虹得志如我思好音託秋鴻

對酒心不樂子舟方北向南風漾孤帆夕陽落波上此別
日以疎兩地勞相望江魚繫遠情蘆月懷高唱我有七絃
琴欲彈寫幽况今人知音難感之益惆悵多言勿謂予子
子大父行

寅庵為蕭憲長作

臣人代天工同寅靡崇庫矧茲蒞邦禁民命實繫之怠心
一萌孽輕重或倒施淫刑召災沴不獨爾職隳賢哉蕭提
刑一敬每自持誰云法可撓五過將汝疵誰云民可虐帝

繼恒在茲忍將一寸心負彼三尺規虞書著告災國法有
矜疑求生苟弗得服念踰旬時東海民無寃南山判不移
閱歲寢以多聲問如飈馳公心益惕若歆然恐弗支大書
揭華扁相對如嚴師出門屢却顧退食方凝思內焉勅爾
心外則慎爾儀萬念協貞吉豈但一職宜有欲稽公行請
誦寅庵詩

五平五仄體

春雲驕難同朔雪苦不足寒聲警人眠曉色奪我目龍鸞
交橫飛玉石兩滅漫天開先春花地秉不夜燭沙鷗湯煇
翎海鰐陸死骨輕塵揚遊絲暗嚮遞折竹空林炊煙遲近
市酒券促平增江山清厚滿澗壑欲荒汗蒙包含燧蠃賴

斥逐天心昭來牟帝命走嶽瀆歡呼馳黃童瑞靄動白屋
行將登絃歌豈止塞口腹而予章縫儒濫擁繡豸服觀風
聽民謠稽首効華祝休徵年年加聖主萬萬福

送胡德廷婦丈還京口

天順歲甲申與君同筆硯時我尚垂髫君齒當弱冠君伯
貳守公少起滇南薦顧我先府君曰此同鄉彥而我遂通
冢心交豈徒面因之締姻好我門稟君鷹我童與計偕召
對金鑿殿石渠翻秘書瓊林醉春宴昊天弗我弔家門遭
凶變府君捐館舍遺孤眇於綫扶柩返江鄉客塋非所願
遇君聞公計方寸各糾亂問我南歸計迷途空汙漫滇南
遠莫致巴陵誰眷戀咫尺鐵囊城長江巨天塹古稱朱方

地卜塋豈不善再拜聽其言哀苦和淚嚙府君有遺志重
此骨肉念佳城既協吉買屋如成算公柩亦東還居止同
里閨維兩太夫人高堂凜家範公女復妻子親上親重見
兔絲女蘿枝附引固而蔓荏苒三十年流光迅於電玉樹
紛堵除究竟同一幹猗君今逸民才美不自銜甘與木石
居避名如避箭君舍四壁立懸磬老無怨君身但韋布不
受軒冕絆索居本無競昧者猶誇訕爲別動經年京塵羈
薄宦悠然忽我思棹鼓南風便世途多轉軻顛躓隨歛段
翻成樂正愁數月不輸限吉占果勿藥懷歸速張翰孤尊
未傾顛雙袂條已判茫茫天地間浮生多聚散恨不逐君
還水石同泮渙江東無限奇願使君獨擅嗟嗟先府君高

山軼雲漢我公亦奇特軒然聳魁岸老成雖淪落典型有
垂憲紛紛夸毗子龍葉逞才辨所以宣尼聖甯思古狂狷
贈行述疇昔亦足表文獻去住本向常頰仰成顧盼卜子
須識之勿使供一粲

答吳匏菴先生

止酒和章甚多顧其辭旨不皆同雖契愛者或不
以僕爲然僕竊異之此得高作極感成人之美捧
誦自慰初志益堅奉謝一首幸終教之

止酒懼弗勇猶賴人贊止交遊無限情托之詩句裏言顧
人人殊惡飲纔數子餘或病吾止恐生麴生喜徘徊昧所
適詩訟囂然起最後得公詩深契周誥理公本獨醒人度

物善推已把翫不能釋此志今定矣有如執熱餘而濯清
江浹願恒服公戒毖酒如毖祀

再疊止酒韻答馬宗勉先生

比辱和章莊誦遺體之戒追憶先太安人遺訓惻
然感之媿汗交集非至愛不及此用韻自訟錄以
拜德

陶侃初嗜飲以母戒而止飲不踰常限事著遺編裏事天
如事親顧養崇伯子憶侍先安人過飲輒失喜斯訓猶在
耳音容邈難起昔非養志賢今失敬身理恨無伯俞杖引
咎祈鑿已及時不自懲後悔無及矣酒星天有象酒泉地
有淚矢心天地間焚詩薦時祀

送郭于菴之英山

宣尼嘆剛者謂見不可得世遠俗益頹柔風轉充斥趨
昧所如偃儂成局踏嗟患失徒名教奚暇責君懷誠磊
磊觸之動激烈胸中百千卷瀾倒無窮極平生凌雲氣丹
崖迴千尺闊步信周行俛仰無欵側臨民甫歲期政聲已
輝赫清明照幽隱嚴霜剪荆棘闔境稱神明山移判不易
肯貪五斗粟而受人挫抑靡然風塵中高標挺孤特吾聞
先民戒吏太剛則折矯枉固足多過正翻可惜君看夸毗
子簞豆不奄邑特剛顧成戾與彼同一格君年倏已疆世
事飽經涉而况先府君今儀固不忒門墻夙通家敢視如
秦越我非教君諂亦豈欲君默願持忠恕心應物推矩絜

願爲循良吏惻愍念淒惻勿亢以近名勿許以爲直謙勤
更果斷是乃剛之得君今英山行我亦金陵客公家有程
期一燈話離別沉沉春酌夜從容露肝膈壯哉扶摧圖高
舉振六翮此意君自知多言亦奚益

甯惟臣話舊有作

京華抗師席英俊紛追隨於時雲路中後先爭奮飛文章
華館闔論諱光鎖闥聯班布臺省各各能自持荏苒三十
年大半金與緋建立有大小一節無瑕疵得喪不皆齊貴
此名譽垂君居諸子中灑然絕塵姿敬皇樂從諫封事多
匡時曾毀延齡麻不受若納隍東藩具瞻地早被朝堂推
霜蹄忽以蹶三年滯驂司舊物始光復新聞隨馳我豈

河汾儔敢稱房魏師姓名幸有托聊以慰衰遲一燈話疇昔離緒千縷絲眷言平生交對酒安可辭出門冰雪厲萬物歛華滋灰葭動律管陽回無愆期晚節益自珍特滿須惕而臆編白苧裳勿使緇塵緇詩成寄同志庶以存箴規

登舟三首

南冠隨駕使舍陸還登舟長河下通海日夕無停流北望帝都邇使者心休休顧我獨悽惻圓扉念幽囚此身懼不免而暇爲官謀平生不灑淚那更攢眉頭使者勸予酒病飲不滿甌倚篷聊復歌庶以寫我憂

少年清忠願垂老盟肺肝悠悠三十載行路誰知難奪我鳳凰池置之戎馬間仗鉞走强虜龍沙浩漫漫日月豈不

光江海豈不寬稅駕行有期俛仰復何言

腐儒愧遭逢兩年三命新耿耿方寸心誓委七尺身東巡起彫瘵西征障風塵奮劍當城狐遑恤流俗嗔營營彼何爲巧言方亂真不疑本無兄參乎非知人吠聲亦常態安用此云云天定會須勝君王自明仁

畫龍

幽泉出石窟下注成洪河老松傍陰崖屈鐵迴枝柯神龍蟠其間變化難測摩日夕雲從之油然翳山阿吹嘘石爲走噴吐陸騰波蜚廉不敢噴豐隆聽撝訶如聞歲大旱四野無青禾胡不早爲霖還適沾滂沱焦枯頃刻蘇呻吟轉謳歌不然姿乖懶雖靈安足多我語龍不聞奈此蒼生何

于瑩中奉使南畿因得便道歸省爲賦古詩一章話別
太上貴立德次乃功與言立德乃其本譬如木有根木根
苟弗植枝葉何暇論吾鄉晚得子寶之如璵璠所寶在行
誼不在葩藻繁青雲始發軔素心願無諛緇涅不再白圭
玷難復完吾人希賢志何止韓范間莫學夸毗子浮詞飾
輪轅休哉慎所適勿憂行路難

約齋爲周都諫子庚賦

茫茫太極初眾理同一原卷之不盈掬散滿天地間吾人
極功用造物相周旋萬殊自一本執要乃馭煩譬如木有
根柯葉斯阜蕃如水出有源滔滔亘朝昏不然潢汙涸榮
悴如掌翻君庵故名約此意師曾顏平生慎自檢動止不

踰閑博文先有地曰唯非謾言吾將探其頤有得斯喟然
但恐上達妙不在言語傳

易書時與中毋不敬曰禮詩義思無邪褒貶春秋旨爲學
貴知要知要乃知止胡爲章縫士未究知止理譬如不繫
舟汎汎茫無涘多言祗害道務博徒爲爾納之矩度中庶
其弗畔矣

大哉約之義惟儉乃一德以約能鮮失宣尼示民則謂甯
儉與固斯言有深惻吁嗟五陵豪服食華已極紛紛土木
妖甲第日充斥苟可快一時千金不自惜終恐伏禍機成
敗纔瞬息鬼神亦惡盈天道謙乃益所以君子心朝警夕
猶惕可欲恒取廉庶哉保終吉

曹汝學擢南京太僕少卿贈別五首

國初重戎馬兩都各卿寺承平法易隳不獨馬政敝種額
存虛名孽產無實利年年官自印考牧勤命使鞭追窮里
閭朝補夕仍斃本緣人作奸而豈法爲厲終然無寸毛輸
以達燕薊一馬數十金民力苦難繼廟論豈不知曰此今
代制不調瑟當解告朔羊敢棄曹卿吾鄉彥夙抱憂時志
澄清懾官邪建白裨國是會將一寸丹爲此蒼生計如問
用世才事事有經濟

南都本重地太僕亦美官公事苦不多地偏官自間所以
伴我吟賴此環滁山巖洞有遺跡亭臺設奇觀釀泉作春
酒一飲怡心顏烟花自多趣谷鳥相與還醉翁非曠達意

在山水間吏隱有如此歧路空漫漫翻愁席未暖驛召趣
征轅

吾鄉得知已客懷未索莫忽聞君欲去對酒翻成惡交游
豈不多幾人肝膽託長風暗交藪烟花半零落千峯隨客
舟欲往不可遏官遭近家圖書錦人所樂嗟予未脫屣此
興故不薄悠悠江天雲舒卷意無著送君懷舊隱俛仰成
今昨

仕宦貴還家君今衣錦行清尊洽朋歡白頭慰親情天涯
一飛鳥帳望心神驚晴雲淡初夕春潮暗江城君名爲世
重君才人所欽贈言豈終極獨坐念平生

江南數椽屋開軒當翠微把酒引山月臨池褰荷衣悠然

人境間而與塵事違一出六七載懷歸未能歸猿鶴有深
怨鷗鷺空忘機君歸語山靈幸勿嘲我爲栖栖豈所願已
悟前日非

王堯卿自終南謁余鎮江話舊有述四首

終南鬱塞我渭水清且駛美人結廬舍乃在烟霞裏乘風
或振衣枕石還洗耳一出非所安早卷聊自喜宣尼有家
法可仕乃可止間居不無事默坐惟省已太上貴立德文
藝斯末矣吾身備萬物一一窮至理不畏蹤跡深讎愁名
譽起保終慎于始垂休百千祀

昔在京華日勸我宜早休翩然辭我歸許放山陰舟我志
苦不遂忽忽經五秋去年始得謝養疴卧林邱夙約耿未
忘不恤道阻修相見疑夢寐披襟話綢繆烟橫芳草渡雨
暗滄江樓看君尙黑髮朝簪早已投平生遂易學消息探
其幽我老百無庸意欲知悔羞洗心聽君講庶以寡愆尤
美人江南遊及此春意回好鳥弄新聲和風自東來萬物
適所性觸目皆暢懷而况金與焦北固同崔嵬盪曾入層
雲把筆摩蒼崖君勿吹洞簫潭底魚龍猜君勿放長歌激
烈山鬼哀花柳滿前川此興良悠哉歸尋明道跡葆光終
南隈

師道久絕響古風日沈淪彎弓信有之何止越與秦昌黎
憂籍湜餘子安足論况我素虛薄業荒道無聞門牆亦多
士子尤信且親時時效忠告不避流俗噴羣囂未底定亦

復解吾紛節應利金石心可質鬼神迂憇豈足師古道君
所敦此意爾自會難語行路人

發固原論軍士

奉詔發古原朔風捲征衣山川愴離色冰霜厲餘威軍士
遮我道吞聲仍涕洟問公胡爲來問公何遽歸未來我士
瘠旣至我馬肥倉皇忽來去喜極翻成悲公初受明命計
將殄戎夷喜茲數月間戎馬不敢馳長城未就緒套虜猶
潛窺邇聞西海戎伏莽藏禍機公不念邊氓翩然謁帝畿
翻恐一贊功終爲九仞虧予方處非劇聞言增惕而茲事
本天意人謀安所施平生體國心內顧已多違不言吾亦
解慚負明主知恩綸下香漢待我以黃扉臣心故未棄力

不能奮飛肯以垂盡年宵昧貽評譏有疏扣天闕歸餐故
山薇世事耳不聞安能較是非茲聞新大帥銜命來督師
作爾戰士氣恤爾寒與饑爾往各自樹奚用懷我爲

恭和御製五言古詩韻

臣楊一清謹題六月十三日伏蒙皇上召至平臺
手授五言古詩一首賜臣臣頓首捧歸道路歡傳
縉紳交慶咸謂百年曠典今始見之顧臣庸愚何
能堪此服以終身傳爲世寶感恩莫極圖報無由
臣聞虞舜作歌皋陶載賡卷阿游歌周臣矢音陞
下神聖方駕虞帝趾美周王臣固不敢希望虞周
之臣然沐浴清化中亦不敢默以自棄謹依韻恭

和一章錄上睿覽伏惟聖明矜其愚魯恕其狂僭

臣俯伏待罪無任戰兢臣謹言

惟帝嚮南離重明照四方文謨與武烈前作後相望西陲
偶多事起臣督修攘臣志匪邊功所期民物康天威仗遐
被坐籌走氏羌分將老邊塞何意登廟廊召臣復黃扉期
之曰贊襄奎章感褒許爛然雲漢光君王自神聖有位咸
忠良上下交斯泰君者臣之綱臣老心未棄聖言殊孔彰
欽承誓終始百世爲傳芳

夜坐示孫生思和

少小遊庠校爛然文采呈長大益英邁下筆令人驚私闡
戰屢北知者恒未平謁選來京師姓名動公卿文華地本

峻染翰事亦清日直承明廬誰謂非登瀛供奉苟弗懈雲
衢從此升通家從汝祖汝父還汝兄北來會卻少暫會亦
心傾公事苦難了短燭坐長更才美時所忌名出謗乃生
勿擅鸚鵡詞勿爲蝸角爭寧將拙代巧而以晦爲明跬步
防荆棘出口念戎興聞毀慎勿辯辯極毀翻增利害相倚
伏君子戒未萌勸哉曰操修庶以全令名

陳生應期儒而隱於商者詩有佳趣得章秋山之傳

予久不見之一日忽自京口謁予京師留數日辭

去口占三詩爲贈用勸其成

京口舊時派易洞還秋山立言根理道不在辭藻間負笈
紛才俊先後窮追攀蘭茗兼翡翠文采成斑斑陳生性朴

茂早得窺元闕引觚吐芬辭入眼如瀾翻不作雕鏤巧而
逞脂媚顏信口道情性放歌發天慳昧者不入賞作家每
傳看終當守弦轍勿謂知音難

子長昔好遊足跡遍四方遂以文名世橫壓班與楊陳生
本業儒胡爲隱於商周書遠服賈所志親之慶少年沂淮
泗兼涉梁宋疆大河浩湯湯嵩嶽鬱蒼蒼中歲南入楚巨
舸浮沅湘興來賦鸚鵡醉後歌岳陽豈徒吞雲夢或者隘
八荒吾聞千金子坐且戒垂堂倦遊思稅駕束書歸故鄉
葆茲連城珍匱韞還深藏

年來吾家居見子不可得翩然駕方舟謁我來京國老我
病且衰猶作天涯客足難任拜揖眼不辯黑白夙興暮始
歸欵語夜數刻雪意忽冥濛朔風撼林樾沈沈動清酌黯
黯愴離色春來吾亦歸漫勞遠相憶

石亭爲陸質之作

石心不可轉介于保貞吉世事莽難窺君子慎恒德翻覆
雨雲態萬變忽朝夕靜固者惟石特立不肯易伊誰扁石
亭因之測深識葵梅有蕭索松篁或摧折雷風任春撞此
石終不泐特行苟如石福壽可兼得如山不騫崩如川流
不竭主人顧斯亭勉旃休自畫吾家有石淙體物良有益
此意須默識多言真大惑

南坡別墅

南坡近在城南曲南坡主人清似玉結茅作屋幾歲年有

琴在牀書在屋東家桑柘西家禾蹇驢破帽時相過公租
私負兩無累俯仰乾坤樂如何十年塵土長安道欲歸不
歸心懍懍人生難得老來閒身退還應健時好鑑湖恩詔
恨不早匡山舊盟終潦倒爭似南坡歸及時綠鬢朱顏未
枯槁門前載酒紛如雲惆悵舊遊今幾存手種青松盡成
蓋移來慈竹多生孫登高眺遠恣歡譁水邊行吟松下酌
多少低頭拜下風利綱名韁甘束縛白雲渺渺山蒼蒼高
風不媿嚴陵鄉撫卷披圖三歎息爲君擊節歌滄浪

題陳憲章墨梅

有客有客風神清骨爲片玉姿爲冰世間萬物瑣瑣不足
數直與梅花爲弟兄紅塵勞勞恐相失一日不見難爲情
有時摹寫向枯筆奇態頃刻烟雲生湖上春寒雪未霽山
頭月落參初橫嶽然素壁見疎影便欲起繞南枝行古云
意足不在形妙意今與形似并旁人底爲無香惜不道香
多招妬客相逢任託素與緇會有方皋眼中識

水晶宮客

吳興山水聞南州苕溪霅溪滙復流蜿蜒一瀉二百里月
華波影相沈浮中天合有光明燭下見諸山如削玉皎然
蒼翠浮空明何以狀之曰水晶水晶宮名從此始誰其標
榜趙承旨居人紛紛竟莫知對景不樂翻如痴名韁利網
日馳逐却託夢遊徒爾爲汪君此地長爲客坐挹空寒清
興發果然身在廣寒中不似人間波與月歸來偃蹇向深

山縮地有心還未得手持圖畫日把玩尙覺清寒徹毛髮
火雲六月驅不開出門紗帽沾黃埃金流石爍無處避水
晶之宮安在哉東望嵐光滲天日安得與子相徘徊嗚呼
安得與子相徘徊

和歐陽公禁體雪詩韻

長空緯繡觀朝萼脈脈隨風旋回薄望窮寰廣極幽潛至
巧信出天機作江山一洗塵土空使我方寸成恢廓卽防
見覘行且消輕體不受春陽燦閉門靜聽疑有異歷亂聲
隨瓦溝落寒光照室不成寐起坐中庭擁裘貉狡兔矢穴
無所歸饑鷹斂翮難施攫農倉有粟床有醞醉飽歌謳躍
如雀出門翫賞恣所如水行孤舟陸雙屨一官坐食百無

補矧敢暇逸先民樂題詩苦無道韞續取茗不待家姬滌
紙窗官燭夜沈沈翠柏蒼松雲漠漠翻思京國十年事白
戰壇中曾擁檠短歌聊爾代風謠不似尋常浪吟嘯

和蘇長公聚星堂禁體韻

風團一掬浮桐葉瓦爐活火初烹雪是時真宰設奇觀物
態人情兩幽絕懸岩老樹僵不死生意往往存摧折江山
一色天真冥鳥影不度人蹤滅孤舟把釣吾所愛有肘真
被微官掣急呼紅燭照金杯不覺醉顏生綺纈歐蘇白戰
有嚴禁餘子效顰徒瑣屑今我不樂真成癡半百光陰過
如瞥嗚呼世人多附熱此興蕭蕭向誰說君看桃李鬥春
妍謾道廣平心似鐵

岔口遭虜變越三日過其地作詩紀之

莊浪西來岔口驛醜虜當年曾數入自從元帥傾虜巢兩
歲邊城稍寧謐春草青青塞馬肥豺狼有性難羈縻長驅
直入五百里竄伏荆榛藏禍機閏月十九晨初飯潛度重
巖下平阪路旁整堦有若無瓜空燃烽誰付管城中兒女
不得知壯耕少牧方嬉嬉卒然至前無處避如以鷹鷂掠
雛雞城東城西數十騎毒矢射城張虐勢耕牛站馬一網
空跳嘯還從舊途去二百城中按伏兵縮手無措心神驚
迫之欲出不敢出黠虜睥睨如空城莊浪得報曰當午守
將聞之怒於虎兩軍並進分道追殞首捐軀那復顧龍沙
漠漠風塵昏賦聞兵至褫其魂兩酋迎戰亟授首餘孽倉

皇窮力奔自知天誅不可赦盡將虜掠歸吾軍須與雪花
大於手墮指居然十之九一矢不費全軍還信是田禽執
無咎丁男纍纍脫虎口那更遭寒死川藪將軍下令收其
尸餘澤猶能及枯朽歸者相見如更生去者茫茫空有情
婦哭夫男母哭子我來尙聽嗚嗚聲兩旬之前過此地安
堵人人道無事乃知事事貴先幾慎勿從勞後時計徒薪
休待火方然墻戶須當寒未至東隅已失桑榆收掩面不
隔城頭羞將軍功過畧相準直須據實陳宸旒

錢宗玉所藏玉元章墨梅

吾聞王郎傲世者白眼看人氣凌駕平生好爲梅寫真一
幅未論千金價古枝樛曲老不凋渴龍下吸長江潮微雲

墮空成點綴清風近人疑動搖世間尤物信不志意匠無
乃經營勞何遜林逋俱已矣冰姿玉骨無知己鐵心石腸
徒自喜此圖零落知幾年錢侯受之入骨髓君不聞物之
顯晦良由人浪傳仙筆能通神

何君竹逸持此圖爲憚君雪江壽索予賦之

小仙酒酣圖老翁神氣炯炯雙方瞳粵從西池謁金母錫
以一粒蟠桃紅暉君家住大江東瀛海咫尺蓬萊通生辰
開宴集賓客正及春王正月中願君眉髮如翁白啖盡山
桃種其核一年一宴三千年看桃開花更結實

沈石田三吳山水卷

職方有藪名其區三江之雄五湖腴碧桃萬頃玻璃色生

意類仰隨鳶魚千巖萬壑共拱揖林木葱蒨蒼煙集翠微
依稀入空莽茅堂生苔土花澁洞庭山連朗月灣柳枝蘸
水濕不乾石路縈紆穿細嶺陰風淅瀝生高寒固知開鑿
自天地雖有雞犬非人間有誰獨往占幽僻孤松鎮日相
盤桓有誰臨流不洗耳仰面踞坐聽潺湲有誰輕舸泛寒
綠酒酣耳熱回朱顏高山一曲不可和丹崖千仞難爲攀
我生足跡半南北長載圖書隨傳驛吳帆三挂不一遊老
大追思空太息豈應好事不相逢或者山靈闕題籍誰爲
此圖石田翁病眼摩挲似粗識谷口浮雲乍有無澗邊野
草仍蕭瑟此翁胸中富山水興到不待相督迫鑒賞再遇
今劉侯此卷此人非偶得并刀欲剪恨不能詩成畫去長

相憶

錢舜舉漁翁樂趣圖

漁翁樂漁翁樂祇向烟波寄生活長江水明魚潑潑大手
不厭霜刀割前村老嫗新醅醱沽與妻兒恣歡謔世間萬
事耳不聞兒啼嗶嘈猶苦貼兩舟結鄰自來往翻笑屨居
真束縛嚴陵羊裘不無心渭濱後車那可奪江淮以南罟
罾多五湖三泖皆風波漁翁之樂樂如何採樵山中懼豺
虎欲耕戶外愁征科黃蘆瑟瑟秋風滿何處寒江無釣策
漁翁之樂不用一錢買請君試聽滄浪歌

送戴揮使江西監兒

侃侃萬戶侯別有江西遊臨歧遺我絹七尺要我賦詩壯

行色知君不是汗漫行憲臺飛檄嚴王程一方轉漕賴監
押兵民命脉須關情摧堅解紛良不易自古盤根知利器
莫言異地不相謀須把一心勤國事姑蘇山水錢塘湖桐
江之上如畫圖鄱陽秋風渺空濶匡廬秀色凌虛無公餘
登眺飛觴舉去歲東君今在否囊中詩句動百篇處處逢
人皆快覩丈夫生來志四方紛紛株守限封疆君才磊落
眼前少雲夢胸中未可量

撚鬚亭爲劉希載賦

撚鬚亭上客吟哦苦吟不了如鬚何嘲風詠月暮復旦一
吟一撚將無多神遊象外坐無語仰面不避王公訶吾聞
風雅適情性枯腸無乃窮搜羅君不見唐家杜陵死狗癖

明真齋五名臣集

楊文襄詩集

三十

飯顆甘受詩仙呵后山閉門亦何事擁被呻吟如抱疴亭
前物色清如許鬚固可斷心不磨君看子思能百戰爲語
山谷休橫戈

張五老壽圖

留侯孫子生盛時醜顏紺髮雙黃眉錦堂春酒照春色人
間豈復殊瑤池堂前寶樹光風滿堂後春陰初日遲霓裳
羽衣且莫論請看翩翩戲綵兒玉桃花開金母宅仙翁食
桃去其核核多直與崑崙齊笑指滄瀛化卷石彩雲堆中
三老圖相逢似語天地初青松古作丈人行白鶴下應山
童呼神仙渺茫不可問此翁此壽今所無

廣武吟

廣武城西邊塹邊黃沙白草何茫然我行旌旗耀天日千
騎弓刀相後先須臾直北風塵起炮火絡繹隨雙烟毳衣
氊帽胡爲者百數十騎聲喧闐我士銜枚寂不語卒然相
逢彼魂褫便遣輕騎畧追逐奔北不敢回頭視山高日昃
追難窮小醜何足當吾鋒不聞周詩詠薄伐况我素不希
邊功下令收兵入城去且秣吾馬養吾弓人言此地此常
事不道我公天上至吾儕幸脫虎口中前日遺骸猶野棄
中原無處無良田此輩流落真可憐爲王戍邊良不惡何
止要貪生處樂

昭君怨

馬駝絃管去不還朔風吹雪暗陰山髻鬟繚亂眉黛損生

世豈識燕支寒自倚朱顏天畀美不賂丹青心不悔黃金
有神解移人何止妍媸能奪真玉鞍慘澹啼紅頰驚沙撲
馬馬不發馬上遙傳胡地辭如訴如怨聲嗚咽君王莫更
傷蛾眉妾自薄命非人爲自從漢女嫁胡兒漢塞已省防
胡師亦知和親非得策漢家將軍空虎貔人生於世貴有
益玉骨胡塵豈輕擲君不見宮中多少如花顏烟霧銷沈
誰爲惜

陸水村所藏盛子昭臨僧巨然江山清遠圖

董源畫法世無前誰其繼之僧巨然肖形侔色非所貴點
染妙在風神間武唐盛生近時起亦復經營極摸擬細觀
巧思入秋毫咫尺真同千萬里誅茅結屋柴桑徒見不可
得况可呼疎林密石相映帶幽溪細路時有無如此江山
清更遠竹杖芒鞋嗟已晚小院飛花空復春間庭落葉無
人管水村愛畫今到侯殘紙斷墨勞兼收予生嗜好畧相
似却愧賞鑒非公儻塞鴻無聲沙月白兩兩扁舟遡空碧
幾時歸共舟中人長聽江聲看山色

涯翁先生初度之辰和所作者英會圖歌韻爲壽

成功不居視若無閒情早賦歸湖圖擁門賓客爲稱壽惟
公與我同是文僖徒爬搔鬢髮秋霜改指點朋舊辰星疎
悲歡夷險飽經歷金石一念還當初是時朝廷方偃武中
原掃蕩無豺虎訂謀元自出綸閣動躋宣將載盟府懇辭
恩廕但求歸十疏回天謝簪組前身本是謫仙人袖中光

華五色文甘盤舊學帝所眷默運元化銷氛塵雷風春撞
坐可定苦辛調劑終能均伊周以上貌莫覩富韓文呂皆
其倫生賢固待作霖雨君看初度正及六月三三辰幾回
詔主文場事藻鑑盡收天下士至今桃李蔭餘春館閣詵
詵連省寺回首江南佳麗地招公不來豈天意姓名司馬
誦兒曹出處東山繫斯世一年一賦樂天詩老去風情信
有之要看百歲從今數更閱三年是古稀少日相逢開笑
口白戰彩毫長在手中年仕路各參商我持節鉞公台斗
祇將書札謾論心翻爲風波聊聚首西征起廢重入朝相
顧皤然成兩叟劇談深夜動清酌此意亦知非在酒宋朝
耆英十二翁丹青照眼多名公奇蹤盛事絕無而僅有與

君擊節三嘆懷高風君今超然脫屣去獨向泥滓瞻蜚鴻
少君八歲精采較君弱蒲柳不與松筠同力不稱心難奮
庸早晚得歸隨老農年年學製南飛曲願托鶴使附上雲
霄中底須同社自同調氣感聲應蚓與蟲猗歟休哉祥光
午夜垂桑蓬豈無羣仙驂鸞來自東丹霞金鼎倘可乞願
力薪水長相從

壽麓翁先生

公生正當明盛年前身元是蓬壺仙玉皇勅註金闈籍日
侍幃帷供御筵帝曰良哉此忠蓋宮事府事咸咨焉秋霜
烈日氣浩浩長江巨海胸淵淵披腹造膝近希有退食未
罷聞傳宣手持虞廷五色線密補袞繡光華全成功不居

益惕若妙用斂盡方寂然一封謝病優詔許授簡爲著間
居篇消磨歲月盃中物陶寫性情囊裏絃揆余初度及佳
節中元之後仲秋前金風翛翛蕩餘暑玉宇澄徹明台躔
增庭尙留萸四莢壽算終期椿八千帝遣羣仙下稱壽雲
際駕鶴來翩翩豐隆驂乘望舒導芙蓉垂旌羽蓋懸一翁
疑是羨門子獨騎蒼鹿過芝田蟠桃有宴今始見真珠爲
漿瓊作鮮雙成吹笙弄玉和九奏萬舞聲誼闐琪花瑤草
亦無數青壁千仞世人想像難攀緣吾聞皇天壽平裕公
有勳德誰齊肩神仙荒唐不須論爲善獲福此理昭灼無
私偏君不見蒼松矗空山拔地吾識良工有深意

畫鴈

江岸蘆花秋簌簌江頭族鴈羣相逐啄者白啄宿者宿叫
入斜暉斷還續秋來砂磧已冰霜去寒就暖爭迴翔物生
有性各自適何處江湖無稻梁高飛冥冥謝熠弋借取扶
搖雙健翼惱亂遊人萬里心驚起漁家數聲笛昨夜南樓
聞北風天長水濶雲濛濛何當便買舟一葉醉來掉入蘆
花叢

題方朔偷桃圖寄壽蜀楊翁一元

度索之山萬仞高山前山後蟠仙桃花開結實六千載直
與元氣相遊遨丹霞作衣瓊作漿金母愛之不忍嘗何物
小兒能竊得化爲一叟鬚眉蒼叟今名注神仙籍種桃已
見垂垂實欲徃從之天一方峨眉崔嵬錦川碧

假山爲曹少卿汝學賦

江南無處無雲根結爲幽石春復春族分類聚品格異震
澤所產還超羣沈潛水府乍出沒吞吐不厭泥沙渾倔強
直與雷霆鬪偃蹇似作蛟龍蹲誰將鐵網下採取怪狀奇
形難具論城中見者驚且走共疑鬼斧劈崑崙危峰磳砢
丈人行環視培塿皆兒孫突爾出仙掌若然開劔門孤撐
挺相向眾附爭來奔洞如神剝穴天劃倉卒變幻迷朝昏
或時廉稜露鋒刃遊人有手不敢捫乃知匠氏無遺巧意
象恍忽天機存曹卿愛山自韋布猶恨青山隔庭戶開園
疊石今幾年人道經營有神助潤州佳山亦無數布襪青
鞋隨舉步清晨舉眼便看山頓覺霏微起烟素落日長涵

紫翠痕白雲深鎖莓苔路客來攜酒共登賞有屏可倚橋
可度或眠贊皇石或撫淵明樹真邪厲邪兩不知對境謾
作曹溪悟尤物於人故有緣作戒平泉真已誤爲君重和
假山篇亦欲相從向遲暮

蓉溪書屋爲金都憲舜舉賦

錦江之水天下清錦江之花天下名縈紆映帶數百里芙
蓉點染秋波明何人結屋溪頭住問是君家讀書處讀書
萬卷筆有神一日乘風上天去雲霄力倦還故廬滿家袍
笏滿床書弓裘文采照南國物態直與人情俱君今再起
中台立池上又看雙鳳集故知秋色老偏宜萬里鄉心夢
還入君不見千林黃葉秋霜嚴錦窠簇簇方爭妍拒霜之

名亦安用花豔經霜翻可憐歲晚心情更誰識舊日元都
已無迹芙蓉銷歇溪水寒繞屋松筠手親植

南濠吟爲都元敬少卿作

環蘇皆濠南濠獨佳室廬櫛比舸艦雲來遠睨青蒼近濯
沅涸君子覲止僉曰雄哉有熾人居於濠之涯地喧心寂
匪俗則諧移家伊何郡城之隈濠是遠而以莫不懷堂構
則嘉煩囂我侵羨彼光福我幽我尋山亦豈不邃水亦豈
不深南濠之思難爲平鼓釜岌兮觴清吟濠不在眼常在
心水有源木有本我因君發深省滇南京口遙相望兩地
風情同石淙君不見濂溪之濂廬山麓古亦有然非我獨

崆峒圖爲錢卷庵壽

崑崙東來萬餘里孕爲崆峒轟天地桃花萬點映清溪翠
屏丹厓粲如綺固知開鑿自鴻濛誰其樓之廣成子饑餐
玉臺霞渴飲銀潢水千二百歲何足論直與天地相終始
昔者軒轅來問道百十數言存至理忽騎元鶴遡空旻玩
弄日月驅風雲歸來還向舊山住世人可望不可親猗歟
神仙之說知有無良工謾寫崆峒圖作圖賦詩爲誰壽卷
翁有道神仙徒生平胸次澹秋水傲睨斯世如泥塗鼎中
龍虎自看守若計年歲直待滄海揚塵山石枯我遊崆峒
陟仙臺决皆寥廓心顏開仙踪渺茫不可覓但見玄鶴兩
兩旋繞肩輿來我欲招之跨汝遊八極國恩未報神仙於
我何有哉稅駕江南已遲暮遙望仙山隔烟霧頰翁示我

南華篇共向桑榆保貞素

陸羽烹茶圖爲范原博賦

吾聞大羅天上茶有星日汲銀潢萬斛漱清吟玉皇應憐
世澗濁暫遣下謫爲人形江頭小兒啼嚶嚶誰其得之僧
竟陵長大如鴻漸于陸平生所著惟茶經香色味種各差
別水晶火候一一探其精遂令世人嗜茶不嗜酒濁可使
清醉可醒劉伶安用與婦祀盧仝不待七碗通仙靈功成
翩然返帝闕至今設象懸青冥吾生偃蹇抱茶癖陽羨之
山頻采摘研膏焙乳勤僕奴滌煩釋滯功須策嫩人索賦
煎茶圖便覺清風生兩腋知君有意謝麴生從此睡足日
高胃襟無拍塞

苦旱行 六月三日

瘧氣漫空金伏初火雲萬疊隨陽烏雷鞭不鳴電幟捲雨
脚欲墜看仍無遂令大塊一洪鑪煮石欲爛樹欲枯崇堂
密蔭如坐甌道上病暍何時蘇田疇裂坼禾半死空聽水
聲隨轆轤踏車未停水已竭巨沼剛存一池滂手皴足腫
面如土始信至苦惟農夫土龍芻狗竟虛幻漫向舞雩勤
匍匐誰爲韓子訟風伯欲效魯侯焚老巫石淙衰翁病初
起履不著脚髮不梳如惛如狂坐難定大叫直欲排清都
亦知亢旱本人召古有人旱今誰辜江龍有神能作雨乘
雲東去不受呼比郡盡是斯人徒龍不一視柰爾虜銀潢
之水固不涸願借天瓢三萬壺濡焦植仆須臾事且免餓

李填徧途不然吾將併訟汝上天明明安可誣

開府行

旌旗畫拂烟塵開鉦鼓動地聲如雷路傍羣叟暗相語不
道我公今又來當年從公玉關道我是壯夫今已老似聞
軍令尙精明頗覺容顏半枯槁弓刀萬騎如雲屯多是當
年鞭策人部將生兒還拜將部卒亦復稱將軍自公入朝
佐天子功成身退誠善矣胡爲乎來復此行遠涉沙場千
萬里聖皇求舊溫旨褒君臣之義安所逃不然七十二衰
叟豈任絕塞風塵勞黃河水深金城高我士酣歌馬騰槽
亦知保障乃良策忍使赤子塗脂膏羽書飛騎捷於鳥獵
獵西風捲沙草劍氣晴橫紫塞秋角聲寒咽黃雲曉不用

彎弓射虜營坐銷氛殺回光晶將軍帳前但飲博士女自
織農自耕直遣羯胡齊北渡我車旋指江南路經過到處
題姓名他日知吾來幾度

清平李侯五端以兵部郎中出知吾鎮江府予老病
久不作詩而桑梓之懷有不能自默者爲賦長詩贈
之因憶鎮江前此郡守固多可稱而臺南林一鶚樂
平黎天與僊居王存忠龍谿林廷元之惠政得民爲
深近日長安劉士奇能繼數公後民方安之忽遷山
西提學副使以去予不能無憾於吏部也見山桂公
爲撰李侯謂予曰是足代劉矣予喜甚故併識之夫
以李侯之才之識古循吏有不足爲者予姑自鎮江

之民所知者言之耳

皇仁如天覆九有詔問百姓今安否僉曰民安須郡牧古
二千石今太守潤州咫尺帝都雄虎踞龍蟠在眼中長江
西來渺不極金焦爲障狂瀾東老我僑居餘五紀作守循
良數人爾前有林黎後王林至今頌聲猶在耳長安之劉
才且文民歌清靜如前人胡爲奪之提學去悉使赤子雙
眉顰桂太宰言公莫戚有李郎中與劉匹不然吾赤子潤
民寸心豈敢忘疇昔李侯平生真好修鄒魯之鄉儒者流
丰恣玉樹出塵表心事璧月懸清秋一夜春雷從地起珂
馬蕭蕭發行李潞渚朝垂楊柳風官河暮泛桃花水江南
花柳盛春光君行無地不春陽人道福星臨鐵甕車隨甘

兩入黃堂去年禾苗半枯槁生事不如山水好極知撫字
是良圖莫遣催科爲公惱病來久謝作詩魔早晚拂袖歸
山阿伫立康衢聽民語爲君擊節甘棠歌

題畫松

朔風捲地寒深烈千巖萬壑無顏色貞介獨餘秦大夫力
抗元冥挺高節燕山有客清且狂平生毫素久擅場八月
九月天氣涼解衣盤礴間清觴揮毫吮墨鬼神泣寒飈颯
颯生高堂須臾幻出數株鐵徂徠乃在身之旁潛龍出壑
鱗甲動逸叟倚杖鬚眉蒼歲寒心事此圖識吾識良工有
深意

富春道中雜詠

風雨孤舟話乾坤萬古情山形斷仍續雲氣晦須明漱石
 聊成戲磨崖欲識名匆匆戒行色不獨重王程
 勝遊兼弔古清思轉冷然潮落帆衝雨山深鳥沒烟屐穿
 無窘步纓濯有新篇倚棹須明月漁歌隔暮川
 遠岫迷新漲迴汀帶急流野花疑送客江月巧窺舟獨坐
 成遐想逢人話舊遊烟霞何處所吾亦愛尋幽
 閨苑家何在桃源事亦陳君看結屋者莫是避秦人歲月
 忙中過江山夢裏真早須回馬首遊樂及芳辰

花馬池一首

萬馬踏平蕪天兵此備胡塞深沙草白城迴戍樓孤笳鼓
 連營靜風烟隔歲無要知長治策經畧有新圖

見新月

木杲不離手愁添霜鬢毛皇仁原不隔臣罪本難逃少小
 承恩日平生體國勞長空有新月萬里燭秋毫

題畫扇寄贈段德光檢討

塞鴈來還去吾生亦倦游風塵雙短鬢江海一歸舟山雨
 茅亭暮烟波澤國秋詩成不相見聊得慰離憂

中衛渡河

兩渡河西去今朝還復東野烟隨蔓草沙水沒秋蓬豺虎
 驚心後魚龍變態中故鄉何處所問訊北歸鴻

八月十六日涯翁宅上賞月二首

今夕知何夕西堂看月生縱然些子缺終是十分明草露

團猶濕林鴉靜屢驚南樓興不淺相對倒深觥
一別江鄉月五回燕樹秋嫦娥不改色人世自多愁玉宇
澄如洗銀河近欲流明年江上看高興爲誰酬

送唐雲卿歸江南

世豈憎人好吾方愛子才直躬翻速毀信口或深猜肝膽
竟難託年華苦易催爲山力須往九仍在親培
爲別本作惡衰年重不堪歸鴻猶蘄北落木又江南古道
我何有世情君所諳逢人莫深語風月但清談

除夕有述二首

守歲聊隨俗悠然伴數童寒餘幾刻臘春入五更風木火
爐長暖椒花酒不空迎新兼送舊忍在一宵中

兩歲平分處一燈深坐餘身猶繫朝籍興已在山居久客
童奴狎衰年故舊疎獨憐詩酒病不與歲俱除

用徐子容唐雲卿韻贈別王堯卿

白髮驚春老青山引興多鶯花隨客去風雨柰愁何日暮
一尊酒江頭三疊歌不知從此別相隔幾關河

送朱升之大參還任滇南二首

相見無多日相違更惘然夢醒江閣雨目極楚雲天白雪
傳新調緇衣記昔年遙知他夜月西望幾虧圓
南都稱國士西省重師儒口語非吾惜心盟與歲俱官曹
憐苦節世路涉艱虞天定人須勝前賢論豈迂

茅山和唐雲卿詩韻

世爭趨福地吾亦禮茅君鳥影尙空盡簫聲歸洞聞遠峯
低列宿萬樹閣秋雲明發下山去仙凡從此分

寄彭幸庵

隴雲千萬疊何處是臯蘭莫訝寒暄少須知道路難衰容
憑酒換冷眼索梅看天地恩無極應留一寸丹
別來餘五載老况竟如何白水盟心在浮雲變態多江山
雙眼足歲月一枰磨獨有懷人夢時時攪睡魔

次吳獻臣亞卿遊金山韻

聞君此登眺剛得片時留天遠樓臺迥江空日月浮烟霞
雙短屐風雨一虛舟萬古波心柱天教障逝流

舟中別南山

風雨孤舟話乾坤萬古情此心還赤子吾道負蒼生未別
先愁別迹名更得名不知從此後肝膽尙誰傾

次京師公卿贈素翁韻二首

聖主新更化皇章舊率由君今違廟論誰爲答天休泉石
性成癖行藏道與謀臨滄亭上坐幽思滿芳洲
忽謾相逢處爲情重可憐別當寒菊後歸及早梅前力荷
千鈞鼎文成萬選錢相逢保遲莫吾道日中天

鎮戎道中

躑躅邊城路行行西更西曉寒風掠面日暖雪成泥策馬
頻經險看山漫入題平沙望不極客思轉淒迷

五言律詩四首

萬國來朝日元宵慶賞時彩雲高簇簇明月故遲遲歌徹
蓬萊島花連太液池春風如有意先上萬年枝
玉殿春暄座珠樓月滿空果拋紅萬顆花簇錦千叢淑氣
全消凍香塵不動風願將此樂事推與萬方同
玉陛春如海燈山錦作堆星移珠斗下風引御香來火樹
千枝亂歌鐘萬疊催衮衣隆色養親獻萬年杯
御水通星漢香風起陌塵金門方與假玉漏莫催頻解服
遺邊將開醮賜國人汀花兼岸柳次第總回春

歸興憶京口諸山莊

春雨桃花渡秋風楊柳灣石梁坐終日好鳥鳴關關雲水
徜徉處魚樵問荅間門前喧稚子如候主人還

夢入滄洲野分明是舊遊山城朝夜月野水澗田秋草長
迷津渡花深隱釣舟五年不歸去吾已媿沙鷗

沈提學仲律夜話邃庵和韻

雨過苔堦屐欲沾感時搔首立風簷唐宮獨擁青綾被漢
閣誰開翠羽簾萬古乾坤吾道在百年憂樂此心兼高歌
入夜渾不寐石鼎泉清取次添

送林待用謫姚州

朝廷養士自高皇風節稜稜此激昂抗疏載聞唐陸贄移
書終媿宋歐陽孤忠自保青天在直道看回白日光我亦
低頭拜東野遲徊無計挽行裝

補送平江伯漕運還鎮

恭襄遺愛是前規風采居然復見之相國轉輸終佐命土
安漕運更憂時朝廷貢賦今全盛民力東南恐不支宵旰
有懷君識否萬年元氣仗扶持

瑞昌道中

磴雲百尺繞層空亂篠叢苔一徑通瘦馬不禁山上下斷
溪常失路西東乍逢野寺驚僧夢小駐荒郊問土風亦有
壯心能叱馭千金非敢愛微躬

華容訪劉國紀東山別業

南北萍蹤六載奇故人顏采夢中疑如何遠客尋幽地剛
及東君駐馬時別去定應懸一榻相逢還爲解雙頤東山
合有蒼生念况復勳名鬢未緜

登科猶記少年時不道才名與數奇歲月幾多憐躑躅江
山如此怪棲遲官非薦士空知爾志在憂人欲叩誰珍重
賈生長治策萬年留取對軒墀

和韻寄章德懋先生二首

夫子文章一代標鳳麟端合瑞中朝直將正學歸岡洛若
究真才失管蕭湖海朱絃聊自語乾坤白髮爲誰饒如君
勇退懸車日曾待山翁折簡招

早從科甲占時名曾有昌言補盛平一代文章天下士百
年憂樂古人情儀型自合歸山斗風采人猶仰鑑衡幾日
停雲漫相憶新詩翻引百愁生

東于守正

萬里江天陰復晴相逢漫語未分明也知湖海飄零地不
盡乾坤覆載情事到定時猶夢寐路從難處見平生不須
更問君平卜識破機關百念輕

赴任途中有述

江左朝天掉未開璽書還向日邊來并汾舊是多賢地章
句元非用世才不遺縹塵生白壁敢於嘉穀謝汗萊王言
自有權衡在鸞鳳鷹鷂莫浪猜

挽鏡川先生二首

龍蛇入夢歲云徂公去飄然不可呼一代文章韓吏部百
年道術董江都官尊未改山林興病起猶懷社稷圖却憶
漢家麟閣裏如公風采定誰模

極知碩輔由天降誰遣中朝失此翁元老存亡闕象緯相
公名字識兒童家無長物鏡湖上國有遺憂金匱中見說
希文諸子在後來門第足清風

贈樊廷璧憲長擢應天尹

十年南國三乘驄義氣壁立千仞峯堂懸生魚非矯激身
騎猛虎還從容五陵合避韓京兆百姓能舍包開封畫船
搥鼓渡江去春陽一夜回窮冬

詔錄開國功臣後裔

當年授劍掃羣雄萬死艱難百戰中國有大蒸遺像在家
無尺土舊盟空天王許續河山券太史重尋竹帛功不獨
兒孫知報主英魂猶解佐元戎

五月十五日逢先母忌辰哀一首

淚眼懸河不受揮年年今日痛慈闈聽隨風木聲猶急恨
與江流去不歸客裏盤餐甘亦苦夢中顏色是還非一官
竊祿成何事况是松楸萬里違

行部至朝邑得報蒙恩進官仍理學政有作

東晉西秦歲屢移璽書二度下官墀極知金紫沾恩地敢
忘蠶鹽未遇時章句恥將身作範官曹聊以位相師河流
百折終歸海欲障狂瀾恐不支

三原壽冢宰致政介庵王公

白首三朝社稷臣水中龍馬見精神長持國是終辭位欲
報君恩肯愛身舊日丹青綠夢傳當年崧嶽又生申登堂

亦有岡陵祝半爲吾皇千爲民

一品官階入秩強清風都付午橋莊百年桑梓耆英會兩
世絲綸畫錦堂直遣兒童知姓字似聞軍國待平章陽和
又逐葭灰動管取年華與日長

葉竹蒼松年復年容顏雙鑠地行仙官如彥博身兼壽心
似希文子更賢天下達尊聞有幾人間五福見誰全不知
海屋籌多少八十從今數八千

相國歸來雪滿顛儀型隨處有人摹丹心直與青天在赤
手曾將白日扶位極人臣唐尙父家傳清白漢司徒狂瀾
一決滔滔是更有中流砥柱無

送都憲陳公巡撫宣府詩有序

憲長三山陳公被簡命爲都察院右僉都御史奉
勅巡撫宣府節制諸軍事予時出巡河西諸郡縣
有傳邸報至者曰念淺薄賴公磨切一旦別去心
用戚然輒成小詩一首馳寄之既還司陪飲之餘
其得八首公之風神器度可以概見若離別戀慕
之懷雖不能不言而實有不能盡言者也

一官中外足清風濯濯聲名簡帝衷總爲北門須冠老忍
教西土失韓公平生道誼交能幾多少肝腸話未終願得
旌麾暫延佇更將藥石啟愚蒙

重城列寨起嶙峋極目龍沙萬里塵朔漠以南纔此鎮文
莊之後可無人行間武勇還知義氣向嚴凝却有春不用

燕然重勒石蚤看相業畫麒麟

十年簪筆侍天闈長憲超遷出異恩宋璟到來春有脚于
公讞後獄無冤河山重鎮留新詠桃李春風滿舊門應是
交親非一日怪來臨別幾銷魂

多斧新兼節鎮榮法星高並將星明先聲遠到陰山窟威
令嚴於細柳營不信兵戎非素學祇將忠義誓平生范韓
事業君休羨今日中原異汴京

近塞降胡職貢開文皇親賜璽書來當時德意羈縻爾今
日動勞保障哉戰罷青山猶白骨棄餘平野尙汙萊憑君
莫話開邊事多少凋傷氣未回

素心非矯亦非隨聲戒孤高跡戒奇明比薛宣翻自晦廉

如胡質恐人知傳稱長者固如此王有盡臣今在茲正是
交遊沾溉地西風愁問路多岐

宦途聲利公無取朋輩交遊我最深俗子謾勞誇覆手丈
人元不解機心鷹鷂縱猛何如鳳鸞豈雖多不謗金願學
未能空仰止幾回低首愧冠簪

公餘長得叩龍門一日三秋意未論剛到別來先入夢欲
成吟處已忘言多情佇聽西歸鴈無計能回北去轅此恨
縱深猶自遣不勝墮淚是黎元

停車

停車樹底問田夫民瘼年來苦未蘇十日爨無三日飯四
分人辦九分租田園舊主今餘幾雞犬荒村恐漸無記取

流離彫落狀監門誰爲寫新圖

嘉峪關

嘉峪關頭西更西聖朝封建幾藩離不勞尙父盟回紇又
見陳湯斬郅支萬里總歸唐節度諸番爭覩漢官儀天威
咫尺驚心地盡是梯航納貢時

還至莊浪

平沙落日路漫漫千里風光一色看剛道雨來翻見雪偶
然熱後忽生寒城非據險兵猶少地屢經荒食更難稍喜
沿邊諸將吏肯甘清苦慰彫殘

讀李進士夢陽詩文喜而有作

細讀詩文三百首寂寥清廟有遺音斯文衣鉢終歸子前

日涉自三台
三十一
輩風流直到今。劍氣橫秋霜月冷。珠光浮海夜濤深。聰明
我已非前日。此志因君未陸沈。

送趙孟希黃門持節蜀藩册封

天子臨軒頒玉册。使臣持節出金扉。宗盟禮重周封建。近
侍名高漢瑣闥。蜀道山川春似錦。楚鄉車馬晝生輝。還將
翰苑揮毫手。無限民風盡采歸。

寄仰方伯舊憲長三首兼柬徐方伯用和柳憲副拱
之

公來落落幾知音。公去淒然直到今。身老不移薑桂性。官
尊猶是布韋心。半窗風雪孤燈在。萬頃波濤一柱深。自古
旬宣稱重寄。似聞枯朽待甘霖。

曾共含香侍內朝。別來雙鬢已蕭蕭。言非知己慵開口。禮
向權門怕折腰。塞上春雲晴冉冉。江南芳草綠迢迢。與君
預定間居約。兩地相尋故未遙。
灞水橋邊送別回。黯然懷抱未曾開。如何骨肉通家話。剛
得緘封幾字來。載路遺陰猶隴樹。滿城春色又江梅。南州
徐孺河東柳。無限新詩與共裁。

過中書舊直

少日鳳池誰奪我。明廷雞舌久含香。雲霄舊侶飛騰盡。湖
海初心次第償。玉筍尚依天咫尺。紫薇空對月昏黃。馳驅
合是微臣分。猶自從容翰墨場。

餞朱懋恭同年城南席上限韻

乾坤正氣養能成。歷徧江山老更英。鐵漢歸來猶苦硬。貪泉飲盡見真清。丹楓照眼暮天碧。涼露滿空秋月明。無限離愁無處寫。祇將金石蒞心盟。

斗酒難開別後顏。宦情鄉思繞江干。西風落木頻搔首。細雨黃花一倚闌。文以義投無久近。政隨俗易有嚴寬。漢家三尺君能事。又向盤根錯節看。

竹逸爲何思道賦

渺渺平沙接水村。此中聊可避塵氛。清憐白屋通孤逕。老愛閑身伴此君。夏日涼生深院雨。秋風綠送滿溪雲。七賢六逸休重道。一叟幽情自不羣。

壽劉中書母天人故閣老壽光劉先生之配也

老去潘輿樂未厭。幾人榮與壽能兼。中書門下身重到。申國夫人教本嚴。裙布儉看封後著。手機勤憶貴時拈。年年歌管稱觴地。記取春風滿畫檐。

湖上作

湖光入望寺門前。淺水平河斷却連。對景不妨詩當酒。傍溪聊藉馬爲船。及時不樂真徒爾。此景逢人亦偶然。淨洗渴塵三萬斛。舊遊重續定何年。

送侍講劉司直先生

舊京求士有封章。詔進儒臣下玉堂。收盡英才唐陸贄。變來文體宋歐陽。中州正派分河洛。南國重遊識鳳凰。留取平生華國手。山龍看補舜衣裳。

入關 弘治癸亥八月奉命督理陝西馬政

手提文印七年還五載乘輶又入關化雨三千秦子弟秋風百二漢河山恩深欲報無遺力位重非才有厚顏却望華峰仙掌近丹梯何地可躋攀

翰撰康德涵謁予平涼行臺

一疏承恩出禁闈入關人道狀元歸光生梓里明宮錦春溢慈顏坐暖暉盛代科名真不忝平生忠孝莫相違瓣香綠野憑君問遺緒誰尋一綫微武功有綠野亭書院宋橫渠先生講學處也當年劍氣欲橫秋高價深藏不待求冀北千金收駿骨關西多士有龍頭板輿華髮自春色白日錦衣非夜遊最是相過重相別一樽何惜更淹留

與常承恩御史夜話思亭和韻 思亭鞏昌行臺亭名

承恩因以為號

夕亭深坐不勝思却喜高情不廢詩鐵面風生行部日鷺車雨過捲幃時十年交誼孤燈在一夜離愁兩鬢知同是天涯羈旅客別君翻恨見君遲

弘治甲子冬十二月北虜大舉入寇有詔臣一清經

畧防禦兼理巡撫受勅之明日督諸軍赴邊

拜罷綸音便啟行邊頭豺虎正縱橫非才敢道寬西顧仗節安能避北征將士幾人稱善戰關山何地是長城主憂臣辱心應苦愧有涓埃荅盛平

送總制秦公三首

老臣承詔起安攘早有威名動一方帳下三年間虎豹關
 西千里壯金湯近看肅敏無多讓遠比希文有耿光昨日
 彤墀獻圖冊雙龍天上捧褒章
 修疆有補更何疑已省防邊數萬師多口不憂羣小愠一
 心惟結九重知終然怨去恩常在管取名高福亦隨不用
 笑談能却敵姓名元自繫安危
 平生勲業半籌邊老去仍都將相權自有胸中兵十萬不
 勞門下客三千風霜不改中丞操甲子看登尙父年天下
 蒼生方屬望封章莫更乞歸田

遊崆峒山 自序

予往年提學陝西凡六過平涼望崆峒之勝而未

之能遊也既遷太常以去頗自悔弘治癸亥奉命
 來總馬政行臺在平涼私心自喜若以為天假之

者越四年始克一遊焉賦詩得三首

鼓吹泠然出半空上方雖遠路能通青龍冉冉歸雲洞碧
 草萋萋問道宮萬里關山長作客百年天地忽成翁欲尋
 仙跡茫無地古樹殘鴉夕照中

直上名山最上頭分明人境有瀛洲鳥啼花落歲復歲樹
 轉峰環幽更幽舊事人誇翻自笑茲行天假不須求向來
 赤日黃塵裏一濯清泉解我憂

一日間行歷翠微十年心賞恨多違青天阜鶴乘風下古
 洞蒼龍帶雨歸林密鳥聲晴聒耳山深嵐氣午沾衣馳驅

未了公家事莫更桃源問是非

野營夜作

旌旗行擁萬貔貅玉帳從容坐運籌鬢有二毛因國老心
無一事爲身謀柳營星散沙場夜雁塞風高鼓角秋但得
烽烟無警報書生非是愛封侯

送王元愷堯卿

向上功夫合與誰先民遺論重蒼龜身心以外元無學風
雅之餘未足詩明道也曾親吏治河汾徒自號人師極知
道理平鋪在時止時行莫更疑

出關

正德丁卯五月欽准謝病還江南用入關韻

九重優詔許東還行李蕭蕭又出關塞上風塵新白髮江

南松菊舊青山祇因多病偏成老可是先憂未解顏若遣
身閒還復健丹崖翠壁尙能攀

送楊太守遷四川提學

讀書讀律兩收功爲吏爲儒道本同無計南州留召父有
緣西蜀得文翁先聲迥出飛霜外春色都歸化雨中未學
紛紛久彫敝頽波誰障百川東

向來學政少全功妙選今非舊格同作郡循良追往哲過
庭詩禮自而翁斯文未喪時方泰吾道分明日正中老我
通家從夙昔送君心逐暮雲東

送陶公甫之南昌訓導

碧雲仙路幾升沈苦盡年來抱玉心齊客叩門無錦瑟燕

日涉南五名目集
臺求士有黃金文章星斗芒終在名教乾坤樂易尋早聽
棟梁稜角詠莫教霜雪上冠簪

題竹屏

春風滿坐玉爲屏占斷淇園數畝青世外一塵無處著夢
餘雙眼爲渠醒影疑鸞鳳空中下聲訝蛟龍雨後聽回首
侯門雲錦障豪華能得幾周星

與郭于蕃話別二首

相留無計又西東俯仰茫然感慨中往事君應忘塞馬宦
情吾已付冥鴻平生口過心無作老去官貧道未窮早寄
平安三五字莫將懷抱逐秋蓬

猶記門牆問業辰一時桃李羨青春名成進士還高價官

到中臺亦要津逸足康莊翻窘步畏途風雨正愁人眼前
故舊應全少把酒臨歧莫厭頻

遊金山三首

坐上青蒼接淼漫樓臺面面枕高寒八牕帆影隨湖過兩
岸人家隔水看江有名山成偉觀天將砥柱障狂瀾塵心
到此消應盡更欲臨風激碧湍

東望海門連北固渡江形勝更無前且拋盃酒尋常債來
試中冷第一泉雲破遠峰天際出月明高閣鏡中懸時清
不作乘桴計聊向松蘿卧晚烟

留雲亭上立多時古木滄波繫遠思南北界分還此水孫
張題後豈無詩風高鷗嶺鶯秋早江轉龍門到海遲三十

年餘塵夢裏每因登眺覺吾衰

正德戊辰四月二十三日被逮詔獄至揚州有作

才薄官高負荷難罪甘縲紲繫南冠飽經世路危何害細
檢平生死亦安行子共憐雙鬢白老天應鑒寸心丹向來
憂病軀全瘦猶自微吟強進餐

一笑

落落長風捲岸沙倦餘行子合歸家訛言正愁市上虎酒
影一笑盃中蛇曳杖閑行隨野鹿看兒默坐數棲鴉向來
寵辱休重問只此優游度歲華

秋興

漠漠歸雲起亂愁思鄉何處仲宣樓關山千里歲月晚風

雨一番天地秋異國烟花驚觸目老年身世入搔頭滄波
落木無窮思慙負平生汗漫游

露下空江白鴈新天涯常是未歸身形容老矣頗看鏡世
事茫然一岸巾知已漸看朋輩少客懷真向僕奴親間愁
賴有詩消得復恐詩魔解惱人

初四日拜總制陝西之勅越二日雨中渡江

拜勅匆匆便啟行敢因風雨緩王程亦知野性惟邱壑浪
說書生有甲兵西徼貌貅回舊節北山猿鶴負新盟君恩
罔極嗟難報不盡除兇雪恥情

謁西嶽祠

仰止心勞二十年瓣香剛得拜祠前三峰坐奠中原地一

柱能擎西極天自有英靈作雲雨莫隨遺跡問神仙扶桑
弱水真何在便欲成吟愧昔賢

喜贈鎮西總戎

聞變提兵不自謀除兇雪恥志全酬衛青出塞空胡幕李
愬銜枚入蔡州河上始傳元帥令城中爭斬叛臣頭肘間
金印尋常事鐘鼎動名取次收

甯夏書事

華戎一統戴昇平何物潢池敢弄兵陸贄詔頒人泣下令
公師出虜魂驚陰雲掃盡天終大燐火消餘月正明受命
獨慙來已後敢辭心力爲經營

賀蘭設險自天成河水西來半繞城邊堠棄餘多虜警塞

屯荒盡少人耕山前鉦鼓黃雲亂帳下貔貅白日明却恐
路人閑指議登壇還是一書生

聞徵命時已入疏乞歸休致

勅使將恩下將壇傳車回首是長安葵心自保傾陽舊鷲
力終憐展步難事偶因人慚受賞身兼多病合休官一封
簡可回天聽歸向江頭理釣竿

平涼悼馬政之廢追憶先皇帝成命志感

勳憶先皇臨御日命臣監牧建行臺雖無十萬諡兵甲何
止三千頌北隸兵力苦緣多事盡弊端紛逐倖門關未遑
釐正空歸去俛首無言聽告哀

再出關用原韻正德庚午十月勅取馳驛赴京

千里承恩驛召還三邊休戚尙相關空將身跡驅塵海豈
有威名重雪山出塞偶緣隨驥尾人朝初喜識龍顏華峰
一柱擎天在仰止徒勞未易攀

途中再具疏乞歸

闕廷瞻望思依依又寫封章叩瑣闈心欲奮飛身苦病壯
思經濟老多違江湖夢與沙鷗狎風雨愁聞塞鴈歸豈是
孱愚甘自棄向來筋力不勝衣

晴後復雨再作

十日陰無一日晴滿門苔色斷人行潦深空自傷禾稼河
挽應難洗甲兵客枕怕移沾濕處隣家驚聽壞垣聲飛茅
破屋知無數不盡憂時種種情

五月十二日詣闕上封事伏候勅旨

紫殿門深午漏遲一封瀝血叩丹墀臣言懇懇皆忠憤天
意明明合轉移苦矣邊兵猶未解傷哉民力已難支向來
無限憂時念宗廟神靈故有知

送楊少卿正夫歸省有序

太常少卿楊君正夫上疏乞歸省其尊甫少保公
於新都上念公伯子石齋先生爲輔導元臣有不
遑將父之情而季方之行併代兄事爲可其奏且
正夫近臣與國大祀又其才器爲時屬望方將大
受不宜久滯鄉邑特命官給驛舟蓋榮其歸而速
其來也余托交正夫父子兄弟間四十年于茲矣

顧方以目疾在告不得躬餞之爲賦近體四章爲贈兼致起居於公聊效區區通家之義云耳

一日三公願不違川中人道小蘇歸恩將寶鑑供珍饌舞著宮袍勝綵衣魏闕遠還依斗望蜀山高不碍雲飛十年一省從今始要見庭椿四十圍

老仙林下自優游盛福全名取次收閣樹烏圍多鳳羽天池鴟化有龍頭三槐五桂皆成蔭翠竹黃花正及秋帝遣仙郎暫歸觀鯉庭嚴訓莫淹留

君恩予告給官程白日錦衣非夜行蘇轍才名還伯仲楊修家世本公卿燕雲壠樹闕離興竹笋江魚繫遠情巴蜀似聞羣盜息祇應廊廟有鈞衡

太常官府本神仙又挾仙臯下九天武署文曹皆睿望舜種周秩共精虔囊中只帶陳情疏馬上多裁漫興篇留取生平經濟念廟堂公望佇登延

承天門候駕是日午後雪作

團團官扇引爐烟閃閃朱旗簇綵旃萬馬踏空翻雪起六龍扶輦自天旋舞兼工羽猶存古隊擁貔熊半出邊人道聖心孚上帝賡將三白兆豐年

送陳指揮還揚州

黑髮功名正未涯早看金紫照烏紗身沾雨露逢昭代業有弓裘是故家天上歸心隨白鴈馬頭秋色載黃花故園只隔長江水鄉思因君轉更除

禮成東厚翁先生時先生分獻大明

碧雲仙路許追隨日月分壇並命時正仰光華能作配極
知臨照總無私聲傳韶雅歌初闕步入高寒下每遲歸到
人間看春色宮花已發萬年枝

劉職方擢雲南少參贈別二首

雨雲翻覆故多端自保平生一寸丹往事閱來如夢覺世
途歷盡見行難百年風教通荒服萬里山川總漢官桑梓
滇南凋敝甚贈君有念切纓冠

送李元伯多史督理陝西茶馬

牧苑茶司次第開祖宗規制亦雄哉金牌玉篆從天降霧
鬣風驥匝地來萬事總關經濟念一官還稱激揚才向來

封事知多少親見重瞳顧屢回

劉希載南還送別

北上纔瞻尺五天懷歸又向白鷗邊撚鬚亭上人方迓待
隱園中榻正懸春水碧連南浦草夜虹晴貫潞河船明年
遲我波心事同試中冷第一泉

送徐用礪太守還任

衣冠鄉里幾相知猶記通家自小時爲士只因從政易此
心不爲作官移升沈有命安能慣發譽從人笑不疑聞說
棠陰今滿地他年應有去時思

尙方曾借斬梟雄歷盡艱危命始通莫裏容心諧口語直
須有意念人窮居常不廢吟哦與遇變方知保障功微解

干將贈君去終教光采貫晴虹

除夕偶吟

笑飲屠蘇最後觴向來桑梓願初償笙歌有意迎春至兒
女無端為節忙歸到頗嫌冬日短醉餘翻愛此宵長因思
二十年前事剛得三回在故鄉予自弘治辛亥至今二十
六年此夕在鎮江僅三年
耳將來未
可量也

醉後再得一首

六十年來忽已翁兒童猶自笑山公感今憶昔三生外送
舊迎新一夜中柏葉心情宜老境梅花消息問東風亦知
俄頃為明歲燈火笙歌興未窮

題竹屏卷

予昔曾賦此今十餘年矣閱之慨然

為君重誦竹屏詩歷歷冰霜歲屢移梅月松風明未冷楚
雲湖水夢還疑豈無俗客真能療縱有浮塵不受緇日
城中飽粟肉為君重誦竹屏詩

安汝礪訪予待隱園喜而有作二首

春城細雨半泥塗靜掩重扉不受呼候吏忽來傳子到病
夫強起喚兒扶眼看世事多新態道與心期是故吾記取
通家交誼在重遊此會未應孤

逸世才華致主自幾年平步入滄津諫垣風采爭誇子學
士門牆喜得人礪乃勸
軒門人芳草碧波憐近別杏花春雨及
芳辰莫教桑梓長留滯聖主方思獻納臣

席上用韻贈何生

老去忘機不羨魚病來尋藥未容徐三千里外初停棹四十年前此卜居掬水有源真活活野情隨地自與與何郎亦是清狂客座上詩成解起予

仲與立憲長致政家居自寶應訪予鎮江宿丁卯橋

莊舍感今憶昔口占近體二首

病裏幽懷久未開忽傳好語隔江來故人相見翻疑夢往事無端底用猜老愛閑居多水竹笑看春色在江梅亦知此會真難得莫使深情伴淺杯
海內交遊幾是真會將肝膽向斯人兩三世裏通家誼四十年來異姓親積毀不須驚眾口素心端可質明神如聞秦泮觀風地道上羣豪尚避塵

把酒論心慰寂寥情多不待尺書招別君尚記庚午歲

德庚午與仲君別於潼關念我遠過丁卯橋浩浩江湖飛綵鷁冥冥風

雨入花朝祗愁會合無多日離恨撩人未易消

提學林君廷元訪予丁卯橋莊話舊

衝風衝雨渡江來病裏逢君眼為開政比陽城甘下考教如胡瑗故多才太行山外雲千里揚子江心水一杯多少蒼生思召父甘棠新頌有人栽

閱汪廷器關中遊舊卷偶題

江漢風流已盡吞西遊直欲到崑崙華山立馬看仙掌底柱鳴橈遡禹門甫里生涯終筆硯子長足跡半乾坤猶懷二十年前事長史文章卷尚存

邊汝成自巡撫寧夏擢南京刑部侍郎將赴任便道
謁余鎮江話舊之餘口占二詩爲贈因憶己未之冬
汝成宿余丁卯橋莊話別詩甚多抱病以來聰明不
逮欲如前日之興已不得俯仰今昔爲之慨然白巖
司馬汝成同志友閱之必有以教我

病裏詩成手自書。重逢又是十年餘。已看精力銷將盡，何
止聰明較不如。西去幾回勞遠夢，南來聊得慰閒居。故人
不道吾衰甚，猶有微言爲起予。
錯節盤根試屢新。路頭夷險認方真。嚼餘冰蘖渾忘味，歷
盡風波有此身。南國山川根本地，西曹才望老成人。白巖
會合多高興，寄我篇章莫厭頻。

閱王堯卿詩文志感

六經文字日中天。前輩儀型已邈然。老去初心嗟我負，古
來遺緒待人傳。剛風早奮驅頽俗，奇氣全收入大篇。留取
舊時衣鉢在，向人那肯作春妍。

送王堯卿還終南三首

高卧經年不出郊。忽聞佳客過衡茅。君才早向青山隱，我
病初還白鳥交。身逐野雲歸舊隴，眼看江柳更新梢。盈虛
消息先天數，有意相留問易爻。

別君容易會君難。不覺流光隔歲看。渭比秋風鵬翮遠，江
南春雨杏花寒。貧如原憲非闕病，跡比陶潛早棄官。珍重
錦囊瑤瑟在，不逢知己莫輕彈。

門臨清滑面南山花柳春來信步看逝者真源猶活活自
家生意這般般舊傳利器藏須密新註遺書補欲完不學
商人高索價知君未改寸心丹

寄林有年御史謫武義丞

辛苦生平志未償直排閭闔叫穹蒼一官重試牛刀手四
海爭傳佛骨章愁極不禁兼抱病恩深猶喜未投荒君家
素老儀型在汗簡同留百世芳

憂國憂民念總勞更於文字識賢豪江湖遠道問舟楫霄
漢低飛惜羽毛捧日有心還入夢哦松無事且揮毫亦知
出處闕名教莫漫臨風讀楚騷

長安周君少安以進士節推吾鎮江三年矣才藻兼

美凡所讞獄多得其情人甚稱之茲考績北上被留
被徵皆所必有恐不能爲一郡淹矣其父御史君應
文子提學時見其文藝器識在諸生中出色旣登仕
籍聲名日起矧期其遠到而不壽以歿士論惜之于
衰病久謝筆硯顧通家君父子間於其行情不能已
爲賦二詩贈之兼以道舊故寓期待云

手持三尺佐分符一郡寬民自此無始信經生能治獄須
知良吏是通儒虞廷佇看朝陽鳳渥水曾誇汗血駒此去
定應書上考向來清譽滿皇都

當年相馬識而翁駿骨今看子正同才不大施摧折早仁
能有後報施公風神絕足飛黃外心事清冰苦蘖中見說

邦人攀戀甚望騎驄馬過江東

上宮一首

上頭萬瓦碧參差側徑迴廊勢半欹
烏怯高寒棧不定雲歸杳靄出遲遲
人間福地應輸此物外真游更屬誰
歌罷輾然成一笑下山休問路多歧

和張世安韻

山光下接洞中洞雲氣遠浮峰外峰
出谷幽泉深送響人林秋葉半翻紅
看來世故祇如此可信名山不易逢
却羨留侯有孫子一編未肯博三公

東卿杭憲副八月間過予丁卯小莊
以北行期迫不及款留擬歸日相斂
盼望久之比歸連雨泥淖不蒙

再過而病夫適在山莊又不及知聞之惘然追無及矣
良會之難如此哉鄙詩二章少代晤語兼柬令兄世卿先生當必有以教我也

北上匆匆約會遲歸來猶擬話襟期
如何載酒尋詩興恰是題門返棹時
山雨蕭蕭寒漏盡江天漠漠凍雲垂
梅花已露春消息好折新枝寄遠思

清尊空對燭花紅山館蒼茫細雨中
開徑尙懷三益至論文那復二難同
英才盡入蘇湖教絃誦不殊鄒魯風
極目天南萬餘里倦遊無計逐雲鴻

送錦衣千戶馬汝礪

文才武略兩稱賢名著金吾二十年
奉使曾持三度節行

囊不貯一文錢
都門早結同鄉誼
京口重逢話舊緣
公論在人須柄用
丈夫晚操願彌堅

與孫廷賢話別三首

小結雲松住近郊
故人忽漫過蓬茅
二千里外師生義
四十年來父子交
名教自應尋孔樂
窮通何用卜羲爻
試看千仞回翔地
覽德終歸彩鳳巢

少年英氣逼人來
壯氣崔嵬老未灰
不信驂騑終窘步
共憐梁棟有遺才
龍光夜躍張華劍
雲影晴浮孺子臺
見說芹宮多化雨
滿川桃李爲誰栽

師道蒼茫久絕塵
泰山孫子更斯人
貧甘苜蓿淡中味
靜挹梅花調裏春
舊日朋遊今復幾
平生肝膽露全真
無言

亦是宣尼教訓說
紛紛莫重陳

送鄉進士吳與成還吳中將赴會試

老去聰明不似初
喜逢佳士自東吳
誰爲陸贄收韓愈
已媿歐公讓大蘇
客路春風鶯出谷
朝陽文采鳳棲梧
科名亦是尋常事
珍重平生遠大圖

贈陳豸史原習三首

神交猶記昔年曾
老向江湖更得朋
二宋文章清廟瑟
兩京風操玉壺冰
君言直與周行重
我病慙慙飽飯能
暫會不堪仍遠別
一時情思兩難勝

病起重來倚玉除
稜稜風骨壯年如
直陳時事張康節
不負平生陸敬輿
復恐都人傳奏草
漫勞司諫有貽書
留君

未得空相憶又是江城細雨餘

高卧滄江七八年停雲相望幾茫然手中五色終華國囊裏孤桐未絕絃渴極正懷商旱雨愁多纒憶杞人天送君更切吾鄉念多少蒼生望息肩

與希大夜話有作

有約相過幸不孤病翁強起尚須扶顏容已覺今非昔形迹都忘子與吾不遺寸心違素學曾將隻手障留都人人解道能藏器可試盤根錯節無

贈謝伯一舉人用前韻

一燈深語坐來溫賓主東南細雨論萬古帝音還伐木七峰明月此開尊憂如賈誼心應苦潛比王符論尚存短棹

匆匆留不住恐因芳草憶王孫

用前韻贈唐子畏解元

丰姿楚楚玉同溫往日青蠅事莫論筆底江山新畫本閑中風月舊琴尊清時公是年來定發解交名海內存長聽金聲愛詞賦天台未許獨稱孫

句容曹御史時範結屋於大茅峰之麓卽陶隱君中館地也予得造焉爲之賦此

闢莽披榛一徑斜忽看傑構倚雲涯誰知異代神仙館又作清時御史家坐引青山當戶牖醉眠白石掃苔花君才可是真成隱况復勳名鬢未華

希宋按江南風采凜凜賦吏望風多解印綬去傳者

或以爲過嚴然玩愒之餘民蠹滋甚不嚴則無以禁
奸戢暴民何所於賴惟在我者有以權之不爲已甚
而已如心之論君其有取乎哉

一從持斧下金鑾江左蒼生拭目看載路清風消酷暑隨
車甘雨慰凋殘朝廷綱紀須臺察郡邑澄清仗法官莫謂
過嚴聊假借一分嚴是一分寬
覽轡江東又一年動人風采眾爭傳南山有判誰撓法白
筆無私不避權世上浮雲驚易變懷中貞璧保須全如心
舊服宣尼訓春雨秋霜未肯偏

希宋得代還朝贈別二首

歸采民風奏玉墀一年舉措共稱宜爭看綵鳳來儀地正

及飛龍利見時駝馬都人行尙避甘棠南國去應思黑頭
事業須珍重明道希文好自期

鷺車無地不春陽白簡威飛六月霜不忝冠裳稱多繡未
容城市有豺狼寸心好似中冷水一節真城百鍊鋼定有
自言佐朝政幾人側耳聽封章

與鳳山酌別

度支新命屬名臣上爲邦儲下爲民經世正煩華國手理
財須用讀書人中州時雨當年化南楚甘棠萬樹春霄漢
勲名公等在老翁江上任垂綸

喬希大自留都司馬召拜天官卿中外士夫以此地
屬望久矣而今始如願聞者稱快北上戒程過鎮江

別余喜慰之餘感舊惜別得詩五首情見乎辭
君年十五謁門牆我亦年纔二紀強歷盡悲歡俱白首別
來風雨又重陽廟堂公望今方慰道德初心故未忘折取
黃花贈君去要從簪笏挹餘香
天都從容四紀餘直從郎署到尙書君看魚水交歡日正
及雲龍慶會初已向盤根誇利刃還從熟路信輕車持盈
亦是吾人事珍重成功寵利居
銓衡位重古天官風采凝然屬眾觀謾向甘辛諧世味須
憑砥柱障狂瀾山濤啟事才兼錄毛玠柴車化豈難却憶
往時真黍竊至今懷愧未能安
通家兩世託交親荏苒流年四十春道誼相規猶近古肝

腸可託更何人秋深落木青山盡露下寒江白雁新從此
定知踪跡遠不禁離思欲傷神

衝風衝雨渡長江每爲懷人到石淙京國舊遊能有幾尙
書高誼故無雙病來對酒心先醉老去揮毫興未降暫得
相過還永別離歌欲賦不成腔

陸丞相祠用許多史韻

大忠早秩厓山祀明水新嚴故里祠遺恨直從南渡日壯
懷空憶中興時長江巨海英靈在落日顛風義士悲直待
我皇方雪恥腥羶一洗到今茲

諸客飲待隱園假山次韻

江湖容我一綸竿又闖冰霜幾歲寒老去向誇詩力健情

多不放酒盃乾衣冠自擁青雲座鋒穎誰爭白戰壇山下
兒童休拍手醉中天地本來寬

送素翁被徵命入朝

大老歸朝屬眾觀太平魚水正交歡人間走卒知司馬天
下蒼生仰謝安遇主不辭行道晚許身休論濟時難唐虞
事業經綸了還向滄江理釣竿

素翁將行偶過子家夜宿聯句次韻

今雨何來夜過門途時無補愧饕餮素絲節苦丹心在白
雪歌寒鐵硯存古道百年君與我書香三世子還孫深情
祇在茹簷外坐久真看釣石溫

猶記雞壇歌血盟長宵短燭坐頰更豈因憂國偏成老可

是緣詩太瘦生霖雨正深天下望雲山還繫別來情白頭
事業須珍重世事於人忌近名

潘南山孔修先生自上虞命舟來訪余留數日歸去

此風不見于天下久矣先生高致當于古人求之話

間輒賦詩相投予亦次第和之

兩翁一笑驚相見舊識南山是鉅儒老去望高天下士平
生讀盡世間書封章早已收彤管顏采還應入畫圖同向
青山揮白首醉來吾亦誚吾迂

文明泰運自天開和氣光騰出地雷鶴使銜恩溫詔下鵲
聲將喜故人來知君夙抱匡時畧老我原非濟世才高卧
滄江心事足朝堂歌詠自康哉

一別居然二紀餘暮年深造定何如敢爲臣子難爲事曾
著前賢未著書命駕肯辭千里遠交神誰道故人疏相逢
不作三秋歎喜有微言爲起予

焦山佳處亭次石上舊詩韻

浪打雲霾此石存梵宮燈火共晨昏江山吳楚真疑坼風
雨蛟龍不受吞望遠欲招東海鶴閒居聊慰北山猿祇應
佳處神能護蝕盡蒼苔尚露根

丁卯山莊東南山先生一首弘治初年先生常上疏
請復通喪乃百年所無之正論也晚年深居累薦未
起大肆力於羣經補遺訂誤有功吾道良多此二事
先生大節故詩中及之若政事之優學識之富制作

之工皆其餘事不暇論也

平生海內無真識初見南山眼便青萬古綱常歸一疏半
生辛若在羣經舟從綠野間時過調向朱絃絕後聽擬逐
雲龍相上下共將心事付蒼冥

善卷洞

飛巖盡處露空嵌造物何年爲啟緘明月下窺仙子窟白
雲深護隱君巖筍垂玉柱靈根闕壁幻丹邱怪石鑿歲歲
來遊吾不厭路間荆棘倩僧芟
一竇通明設象多兩泉深注繞陂陀乘流實怕迷舟路看
局虛疑爛斧柯龍叟帶雲歸絕澗鶴仙隨月下平莎幽人
只隔烟蘿外可聽移家結社麼

贈毛用成給事

兩京司諫屬時名曾有昌言補盛平直遣荆公屈明道肯
教韓子論陽城王程不盡淹留興友道從探贈別情却憶
碧雞山下路一尊還爲故人傾

殷石溪遷居用伍松月都憲韻二首

舊居忽更移新里近市分明是遠林屋外清風修竹淨池
邊紅雨落花深壯懷不作書空歎野興聊爲抱膝吟白下
諸山應咫尺不妨多暇自幽尋

君才何止擅詞章冰蘖聲華舊有光問字早呼楊子宅結
廬今比鄭公鄉柳風桐月隨時樂詩卷棋枰伴日長如此
年華容易度鬢毛未許上秋霜

